

ISB'AB'EL CARTA YA' SAN PABLO YATO TET MAKTA AYXAKO YUL ISQ'AB' KOMAM B'EY CORINTO

Yicheb'anil iscarta ya' Pablo

1 ¹⁻²Hanin Pablo inti'an, awteb'il-inan wokan ischejab'o Komam Jesucristo, yuto hak tu' el yinh isk'ul Komam Dios. Ha' hun juxhta Sóstenes chitz'ib'nhento hune' carta ti' wintajan teyet, hex ayexxako yul isq'ab' Komam yul konhob' Corinto. Yu Komam Jesucristo yuxin ayexxako yul isq'ab' Komam Dios. Awteb'ilexpaxo yu heyok iskonhob'o Komam, yeb' sunil mak b'ayxanhetu'wal aya chi'awten isb'i Komam Jesucristo yinh, Komam Jahawil yeb' yahawilpaxo eb'naj tu'. ³Yaq'ab' Komam Dios yeb' Komam Jesucristo isk'ulch'anil isk'ul teyet, yeb' aq'an-k'ulal yul heyanna.

Isk'ulal chikochah yinh Komam Jesucristo

⁴Maxhtik'a chinb'ejan waq'nihan yuch'andiosal tet Komam Dios teyinh, yuto xahechah isk'ulch'anil isk'ul Komam, yu Komam Jesucristo. ⁵Yu hune'nhe heye yeb' Komam Jesucristo, yuxin xaya-ko Komam Dios sunil isk'ulch'anil yinh heyanna, hehelanil hetzoteli, yeb' yitz'atil hewi'. ⁶Yuxin sunil tzet halb'il teyet yinh Komam Jesucristo kaw lanhan isyenilo isb'a teyinh. ⁷Tinanh xin machi hunu isk'ulch'anil isk'ul Komam Dios matzet teyinh yulb'al ayexik'o heyechman istz'ayikal b'ay chul Komam Jesucristo. ⁸Ha' Komam Dios chi'aq'ni heyip helinhb'an heb'a masanto yet chihul islahob'al tz'ayik, haxinwal machi istx'ojal chi'ilcha teyinh yet chul Komam Jesucristo Jahawil. ⁹Sunil tzet chalte Komam Dios masan kaw chij isb'a, ha' xin Komam kexawteniko yul isq'ab' Isk'ahol, ha' ton Komam Jesucristo Jahawil.

Pohleb'ahil xol anma ayxako yul isq'ab' Komam Jesucristo

¹⁰Hex wuxhtaj, hex wanab', yinh isb'i Komam Jesucristo chiwaltojan teyey, hunxanhehojab' cheyute henab'al, mach komono chepohleto heb'a. Wal xin ayobjab' aq'ank'ulal texol, hunxanhehojab' tzet chi'ek' yinh he-nab'al yeb' yul heyanna. ¹¹Chiwaltojan hune' ti' teyey, hex wuxhtaj, hex wanab', yuto xawab'ehan heq'umal tato ay howal texol b'ey tu', hak tu' yalni yuninal juxhta Cloé wetan. ¹²Tolab' ay hex cheyal haka' ti': «Hanhonhti'anh, yinta juxhta Pablo ayonhikojanh,» yeb' ay hex cheyalpaxoj: «Yinta juxhta Apolos ayonhikojanh.» Ayexpaxo xin cheyala: «Hanhonhti'anh yinta juxhta Pedro ayonhikojanh,» kexchi. Tolab' ay hex cheyalpaxoj: «Hanhonhti'anh yet Komam Jesucristo jehan,» kexchi. ¹³¿Tom pohb'ilayo Komam Cristo heyalni? ¿Tom haninan kinalaxkanhan yinh kulus yu hekolchahi? yeb' ¿tom yinh inb'ihan alaxkanh ha' hewi' xin?

¹⁴Wal xin chiwaq'an yuch'andios tet Komam Dios yuto machi hunu-jex ti' wakanhan ha' hewi', kachannhe juxhta Crispo yeb' juxhta Gayo, ¹⁵yuxin mach chu heyalni ta yinh inb'ihan alaxkanh ha' hewi'. ¹⁶Wapaxokanhan ha' iswi' yuninal juxhta Estéfanos, wal hunuxa maka, mach chitit yul hink'ulan tato ahna ha' iswi' wuhan.^a ¹⁷Mach chejb'ilojinar wanikanhan ha' iswi' anma yu Komam Cristo, wal xin to ha' inchejb'an-ilan ha' walnik'ojan Tzoti' yet kolb'anile. Yaja' machi b'ay kintzotelan yinh nimeta tzoti' teyey yunhe heyanko heyanna yinh, wal xin hanhe iskamikal Komam Jesucristo yinh kulus, ha' walik'ojan.

Ayko yip yeb' ishelanil Komam Dios yinh Komam Jesucristo

¹⁸Hune' kuyb'anile yinh iskamikal Komam Jesucristo yinh te' kulus, sukal ye yul sat anma chik'aytoj. Wal yul kosat hanhoh xakonhkolcha xin, hune' kuyb'anile yet kolb'anile ti' yip Komam Dios yehi. ¹⁹Haka' yalni yul Yum Komam Dios:

«Chintanhtzelojan ishelanil anma ay ishelanil sat yib'anhq'inal ti', kat intanhtzenpaxilojan isnab'al anma ay yitz'atil iswi',»^b xhihayoj.

²⁰¿Tzet xin tanhkano eb'naj ay ishelanil yeb' eb'naj kuywawom, yeb' eb'naj kaw helan istzotel yinh hune' yul sat yib'anhq'inal ti'? Wal xin xa-ismeltzoko Komam ishelanil anma tu' yinh sukal. ²¹Yu ishelanil Komam Dios yuxin el yinh isk'ul tato maxhtaj yu ishelanil yul sat yib'anhq'inal ti', yuxin chi'ohtanhelaxilo Komam, wal xin el yinh isk'ul Komam ta yu Istzoti' chijalik'ojanh, ha' chikolni anma chi'anayto yul yanma, waxanhka ay mak chalni tato sukalil ye hune' Tzoti' ti'.

^a 1:16 1Co. 16:15 ^b 1:19 Is. 29:14

²²Anma Israel, ha' k'ayb'alk'tule choche yila', wal eb'naj griego xin, ha' yitz'a-til iswi' anma choche eb'naj yab'e'. ²³Yaja' wal hanhonhti'anh ha' Komam Cristo alaxkanh yinh kulus, ha' chijalik'ojanh. Yul sat anma Israel kaw tx'oj hune' tu', walpaxo yul sat anma mach Israelo xin sukal yehi. ²⁴Wal hanhonh awteb'ilonhxa yu Komam Dios ti' xin, waxanhka Israel maka mach Israeloj johtaj tato yip yeb' ishelanil Komam Dios ayko yinh Komam Jesucristo. ²⁵Hunteq'an sukal ye yinh Komam Dios yalni anma, ha' ek'b'al yelapno sata ishelanil anma. Haxa hunteq'an machi yip yinh Komam Dios yalni anma xin, ha' kaw ek'b'al yip sata yip anma.

²⁶Hex wuxhtaj, hex wanab', chimheyil texol hex awteb'ilexxa yu Komam Dios tato kaw haywanhexch'an ay hehelanil haka' ishelanil anma. Haywanhexch'anpaxo yahaw hex, haka' eb'naj iswi'ehal konhob', yeb' haywanhexch'anpaxo hex yik'al anma aykano yelapnoj heyehi. ²⁷Yuxin ha' mak machi nich'ano tzet yohta yul sat anma, ha' issik'kanh Komam Dios yuninaloj yunhe yel istx'ixob'al mak kaw ay ishelanil. Issik'nipaxokanh Komam mak machi yelapnoj yunhe yel istx'ixob'al mak kaw ay yelapno yehi. ²⁸Issik'kanh Komam anma yahb'il yeb' anma machi yelapno yul sat yib'anhq'inal ti', yunhe matxa yelapno chi'elkaniko mak kaw ay yelapno chab'e'. ²⁹Hak tu' xin machi mak chu yalni isb'a kanhyehal yul sat Komam Dios.

³⁰Ha' Komam konhhunb'ankano yinh Komam Jesucristo, yaq'nipaxo Komam ishelanil Komam Cristo kohelaniloj. Yu Komam Jesucristo yuxin chonhkan k'ulal yul sat Komam Dios, yeb' yetxa Komam jehi, yupaxo Komam Cristo tu' yuxin kolb'ilonhxa. ³¹Hak tu' chu yijni isb'a tzet tz'ib'-nheb'ilkano yul Yum Komam Dios b'ay chala: «Tato ay hunu mak choche yiq'a'kanh isb'a, ha'ojab' Komam Cristo Jahawil chikanh,» xhihayoj.^c

Iskamikal Komam Jesucristo yinh kulus ha' yalik'o ya' Pablo

2 ¹Hex wuxhtaj, hex wanab', yet kinb'eyan walnojan Istzoti' Komam Dios yinh Komam Jesucristo texol, maxhtaj ishelanil yul sat yib'anhq'inal ti' yeb' hunteq'an nimeta tzoti' kaw nanxa yok walan teyet. ²Yet wek'an texol tu' machi hunuxa tzet ye tu' woche wala'an teyet hanhk'anhe kuyb'anile yinh Komam Jesucristo, yinh iskamikal Komam yinh te' kulus. ³Yet wek'an texol tu' kinnano-nan, inluylunpaxokanhan yu xiwkilal. ⁴Hayet walnihan Istzoti' Komam Dios teyet, mach kexinmontehan yu ishelanil yul sat yib'anhq'inal ti', wal xin to ha' Komam Espíritu Santo yeb' yip Komam Dios, ha' anayto yul heyanna. ⁵Hak tu' xin maxhtaj yu ishelanil eb'naj winaj yuxin heyayto yul heyanna yinh Komam Dios, wal xin to yu yip Komam.

Ha' Komam Espíritu Santo chi'aq'ni johtanhelo Komam Dios

⁶Yaja' wal tet eb'naj ayxako yul isq'ab' Komam Dios, eb'naj ayxa is-nab'al yinh yet Komam, chonhtzotelanh yinh hune' helanilehal tet

^c 1:31 Jer. 10:23-24; 2Co. 10:17

eb'naj, yaja' maxhtaj helanilehal yet yul sat yib'anhq'inal ti'. Maxhka-tajpaxo ishelanil eb'naj jahaw sat tx'otx'al ti', yuto eb'naj tu' chitanhilo eb'naj. ⁷Hune' chiwalti'an, ha' ton hune' ishelanil Komam Dios ewanyehi, yunhe kaw k'ul chonhelkaniko yu isk'ulch'anil isk'ul Komam. Hune' ti' nab'iltik'a yu Komam yet yalanhto maxhto chiwatx'i hune' yul sat yib'anhq'inal ti'. ⁸Hune' ti' maxhtik'a txumcha yu eb'naj yahaw konhob' yul sat yib'anhq'inal ti', yuto ta istxum eb'naj machim yakanh eb'naj Komam yinh kulus, Komam kaw aykano yelapno yehi. ⁹Wal xin tz'ib'nheb'ilkano yul Yum Komam Dios haka' ti':

«Ay hunteq'an tzet watx'eb'ilxa yu Komam Dios tet mak chi'ochen Komam.

Hune' tu' maxhto hunu mak xa'ilni, yeb' xa'ab'eni, maxhtopaxo mak xa'ek' isna'al yinh,» xhihayoj.

¹⁰Hunteq'an tzet ye tu' ti' xayaq' Komam johtanhelo yu Yespíritu, ha' Yespíritu Komam tu' ohtanhe sunil, yohtapaxo hunteq'an tzet ye tu' yet Komam Dios ya'ta kotxumni.

¹¹Haka' hunu mak tinanh, mach yohtajo tzet ayayto yul yanma hunu-xa yet anmahil, wal xin kachannhe yanma hune' mak tu' ohtanhe. Hak tu' ye Komam Dios, hanhk'anhe Yespíritu Komam ohtanhe tzet nab'il yu. ¹²Walonh ti' xin maxhtaj yespíritu yul sat yib'anhq'inal ti' chab'il ju, to ha' hune' Espíritu chitit yinh Komam Dios. Hak tu' xin chu kotxumni hunteq'an isk'ulal chaq' Komam jet.

¹³Maxhtaj tzoti' johtajanh yu kohelanilanh chijalanh, machoj, wal xin to ha' Tzoti' chaq' Komam Espíritu jetanh ha' chijalanh. Hak tu' xin chu jalnilojanh yinh hab'an hunteq'an yet Komam Espíritu Santo tet anma ayxako Yespíritu Komam Dios yinh.

¹⁴Ha' mak maxhto Yespíritu Komam Dios yinh, mach chischah yab'e' hunteq'an tzet ye tu' yet Komam Espíritu Santo, yuto sukal ye yul sat, mach chitxumchapaxo yu, yuto hunteq'an ti' hanhk'anhe Komam Espíritu Santo chi'aq'ni kotxumu'loj. ¹⁵Wal mak ayko Yespíritu Komam Dios yinh xin, hab'an istxumni sunil ej tzet ye tu', ta k'ul maka machoj. Yaja' wal komon anma xin, mach chiq'oji istxumni tzet ye mak ayko Yespíritu Komam yinh. ¹⁶Yuto chal yul Yum Komam Dios haka' ti':

«¿Mak hunu chu isnahnilo yinh tzet chi'ek' yinh isna'al Komam Dios?

Yeb' xin ¿mak hunu chi'aq'ni istz'ajanb'al isk'ul Komam?» xhihayoj. Wal hanhonh ti' xin, ha' Komam Espíritu Santo chi'aq'ni johtanhelo isna'al Komam Jesucristo.

Jet munlawomal kob'a yinh ismunil Komam Dios

3 ¹Hex wuxhtaj, hex wanab', hayet kinek'an texol, mach kintzotelan teyet haka' tet mak kaw yijem tet Komam Espíritu Santo. Wal xin

kintzotelan teyet haka' tet anma yet yul sat yib'anhq'inal ti', yeb' haka' mak uninto yinh yet Komam Dios. ²Yuxin yet inkuywahan texol kaw komonnhe yu intzotelan teyet, yuto haka'to ye nixhte unin chitotxutx-wi, maxhto chu yaq'lax itah tet, hak tu' heyehi. Hakto tu' xin heyepaxo tinanh, ³yuto haka' istxumni anma yet yul sat yib'anhq'inal ti', hakto tu' hetxumni, yuto chichiwako hek'ul teyinh hunun hex, ay howal texol yeb' pohleb'ahil. Chal yelapno tu' to ha' tzet chal heyanna ha' cheyije. Cheb'eyb'alnhenpaxo haka' tzet chiswax'e anma maxhto ayoko yul isq'ab' Komam. ⁴Yuto texol hex ti' ay hex cheyala: «Hanhonhti'anh yinta juxhta Pablo ayonhikojanh.» Ay hex cheyalpaxoj: «Hanhonhti'anh yinta juxhta Apolos ayonhikojanh,» kexchi. Yet cheyalni haka' tu' to haka'to anma yet yul sat yib'anhq'inal ti', hak tu' hetxumni.

⁵¿Tzet yelapno wehan hanin Pablo inti'an? yeb' ¿tzet yelapno ye juxhta Apolos tu'? Wal xin ischejab'nhe Komam Dios jehanh, chejb'ilonhikojanh texol yu Komam yunhe heyeniko heyanna yinh Komam Jesucristo. Ha' munil yakaniko Komam yul koq'ab'anh hununonhanh ha' chikowax'e-hanh. ⁶Yet wek'an texol haka'tanhe haninan intz'unan hunu tz'unub' texol.^d Haxa yet yek' ya' Apolos texol xin haka'tanhe ha' ya' ek' hayenoj. Yaja' yinh kaw yeli, ha' Komam Dios chi'aq'ni ch'ib'o hune' tz'unub' tu'. ⁷Yuxin ha' naj chitz'unni yeb' naj chihayeni machi yelapno eb'naj, kachannhe Komam Dios kaw aykano yelapno yehi, yuto ha' Komam chi-aq'ni ch'ib'o hune' tz'unub' tu'. ⁸Yuxin naj chitz'unni hunu hinhat yeb' naj chihayeni lahan ismunil eb'naj, chischah eb'naj ispaj seel ismunil tu' tet Komam Dios hatatik'a hanta munil chiswax'e hunun eb'naj. ⁹Hanhonhti'anh jet munlawomal kob'ahanh yinh ismunil Komam Dios, wal hex ti' xin haka' istz'unub' Komam Dios heyehi.

Lahan hexpaxo haka' hunu nha lanhan iswax'enkanh Komam Dios. ¹⁰Haxa haninti'an xin, lahan hinan haka' hunu naj ijb'alom yinh watax'e nha yu isk'lulal Komam Dios. Hakojtam haninan wayojan isxe'al hune' nha tu', nanxa hune' naj xin chi'anikanh islok'al. Yaja' hunun mak chimunla yinh hune' nha tu' yilal kam chil yinh tzet chu ismunlahi. ¹¹Wal xin machi hunuxa mak chu yanayo hunuxa isxe'al nha yib'anh hune' ayx-ayo tu', yuto ha' hune' ayxayo tu' ha' ton Komam Jesucristo. ¹²Yib'anh hune' xe'al nha tu' xin, ay mak chi'aniko ch'en oro, maka ch'en plata, maka ch'en ch'en kaw k'ulch'an jilni isxihaloj. Aypaxo mak chi'aniko te te', maka te' ch'im, maka xaj wale' yichoj. ¹³Yaja' yet islahob'al tz'ayik yet chi'il-lax tzet chi'eliko anma, kat yilwelax komunil hununonh xol q'a q'a, yunhe yil-laxi ta k'ul maka mach k'ulo tzet chikowax'e. ¹⁴Yuxin ha' mak kaw k'ul ismunil iswax'e, machi tz'ato tzet iswax'e tu' yu q'a q'a. Ha' mak haka' tu' chischah ispaj seel ismunil. ¹⁵Yaja' wal mak mach

^d 3:6 Ha' chal yelapno hune' ti', ha' ton Istzoti' Komam Dios.

k'ulo ismunil chiswax'e, chitz'ato ismunil tu' xol q'a q'a', chik'aywa hune' mak tu' yinh ismunil. Waxanhka xin chikolchahi, yaja' haka'xanhe iskol-laxilti hunu anma xol q'a q'a', hak tu' chu iskolchahi.

¹⁶ ¿Tom mach heyohitajo xin tato Yatut Komam Dios heyehi yeb' ayko Komam Espiritu Santo teyinh? ¹⁷Yuxin mak chitanhtzenilo Yatut Komam tu', chistanhtzelo Komam hune' mak tu', yuto hanhk'anhe Komam ay yet hune' nha tu'. Hune' Yatut Komam Dios chiwalti'an, ha' ton hex hex ti'.

¹⁸Mach cheyute heb'a sukal, tato ay hunu mak texol kaw helan yinh tzet ay yul sat yib'anhq'inal ti' chab'e, yutehojab' isb'a haka' hunu mak matzet yohtaj haxinwal kaw helan chi'elkanikoj. ¹⁹Yuto ha' ishelanil anma yul sat yib'anhq'inal ti', kaw matzet chalilo yul sat Komam Dios. Hak tu' yalni Istzoti' Komam b'ay chal haka' ti': «Ha' mak kaw ay ishelanil yalni, yinhtik'a ishelanil tu' chitzab'chati yu Komam,» xhihayoj. ²⁰Chalnipaxoj: «Yohta Komam Dios tato matzet chal yelapno yitz'atil iswi' anma kaw helan yalni,» xhihayoj.

²¹Yuxin mach chub' helolo'nhen heb'a yu tzujan hex yinta hunu maka, yuto sunil aq'b'ilxa teyey yu Komam Dios. ²²Haka' hanin Pablo inti'an yeb' juxhta Apolos, yeb' juxhta Pedro, ha' Komam Dios konhanikojanh chejab'o texol, haka'ojtam heyet jehan. Haka'paxo yul sat yib'anhq'inal ti', yeb' q'inal, yeb' kamikal, yeb' tzet ay tinanh, yeb' tzettaj chitohuli, heyet ye sunil tu'. ²³Haxa hex ti' xin, yet Komam Cristo heyehi, Komam Cristo tu' xin yet Komam Dios yehi.

Ismunil eb'ya' ischejab' Komam Jesucristo

4 ¹Kaw k'ul tato mach jinhojanh cheyako heyanna, yuto ischejab'nhe Komam Jesucristo jehan. Aq'b'il kochejb'anilanh jaq'nihan ohtanhelaxo hunteq'an tzet ewan ye yu Komam Dios. ²Yuxin ha' mak b'ay chi'aq'lax hunu chejb'anile yilal yijem chute isb'a. ³Wal inti'an xin, machi wokan yinh ta chexok heyila' yinh tzet chinwax'ehan, maka hunuxa mak chi'ok ilnoj. Hakintu'an mach chinokan wila'an yinh tzet chinwax'ehan. ⁴Walka xin machi hunu istx'ojal chinwax'ehan, yaja' maxhtaj yu hune' tu' yuxin chiwalan tato k'ulinxahan, wal xin to hanhk'anhe Komam Dios Yahawil chu yalni yinh tzet chinwax'ehan.

⁵Yuxin mach chexok heyala' tinanh yinh tzet heye hunun hex. Wal xin echmawe yul Komam Dios Jahawil, kat isyenilo Komam yinh kaw hab'an tzet ewanyehi, kat yaq'ni Komam ohtanhelaxolo tzet ayayto yul yanma hunun anma. Chaq'ni Komam istzalab'al kok'ul hatatik'a hanta tzet chikowax'e.

⁶Hex wuxhtaj, hex wanab', chiwalan hunteq'an ti' yu isk'ulalo teyinh. Ilweto inb'eyb'alan, yeb' isb'eyb'al juxhta Apolos, yuto chijako kob'ahan yecheloy yunhe heb'eyb'alnhen kob'eyb'alan. Ha' hunteq'an tzet chikowax'e ti'anh, ha' chi'ok yecheloy yunhe mach chexpalk'on yib'anh tzet

tz'ib'nheb'ilkanoj. Yeb'paxo yunhe mach chelolo'nhe heb'a heyaniho iswinajil hunuxa maka, kat heyintanhenkanilto hunuxa maka. ⁷Mach chu kololo'nhen kob'a walka k'ulonh sata hunuxa maka, yuto sunil tzet chisje kowatx'eni ha' Komam Dios chi'aq'ni jet. Yuxin mach chu jinikanh kob'a yu hunteq'an tu', to ha' Komam chi'aq'ni jet.

⁸Wal hex hex ti', kochnhe kaw q'alomexxa, yuto sunil tzet cheyoche ay teyet. Kaw xin haka'xapaxo rey heye heyalni, matxa tzet chonhokanh heyu. Yaja' tzettam saq'al ta rey hex, wal tu' ayonhmikojanh teyintaj.

⁹Chintxuman haninti'an tato hanhonh ischejab'onh Komam Dios ti'anh, konhyakojanh Komam yinh sat anma haka' hunu mak kaw islahob'alaxa yehi, haka' hunu mak chipotx'lax yila' anma. Haka' hunu tzet ye tu' tonhe chimatz'elaxi, hak tu' jehan yul sat anma yul sat yib'anhq'inal ti', yeb' yul sat eb'naj ángel.

¹⁰Hanhonhti'anh chonhhal-laxanh suk'al yu chijalik'ojanh Istzoti' Komam Jesucristo. Wal hex hex ti' xin kaw helan hex yinh Komam Jesucristo heyalni. Hanhonhti'anh kaw machi jipanh, wal hex xin kaw aykano heyip. Kaw matzet jelapnojanh yul hesat, wal hex xin kaw aykano heyelapnoj. ¹¹Tinanh xin yexnhe jijlenanh wahil yeb' tajinti'al, yeb' manh xilq'apehal. Chonhmaq'laxpaxojanh yu anma, yeb' machi jatutanh. ¹²Kaw xin chonhsikihanh komunlahanh, yuto yinh koq'ab'anh kaw k'ulanh. Hayet chonhb'ahlaxanh yu anma ha' isk'ulal Komam chijalanh tet. Ay b'ay chi'ek'ya' janmahanh yu anma, yaja' chijaq' techahojanh. ¹³Kaw tx'oj istzotel anma jetanh, wal hanhonhanh xin kaw aq'ank'ulal chu kotzotelanh tet. Haktik'apax tu' tinanh, haka' isq'alemal yeb' isyah'b'enal tzet ay yul sat yib'anhq'inal, hak tu' jehan yul sat anma.

¹⁴Maxhtaj yu kexwaq'ni tx'ixwojan yuxin chintz'ib'nhetojan hunteq'an ti' teyet. Wal xin to yu waq'nihan hekuyb'anil, haka'ojtam kaw wuninalan heyehi yuto kaw xahan ay hex wuhan. ¹⁵Waxanhka ay 10 (lahonheb'o) mil mak chexkuyni yinh Istzoti' Komam Jesucristo, yaja' haka'tanhe hune'nhe hemam. Haninti'an haka' hemam wehan, yuto hanihan b'ab'el walan Tzoti' yet kolb'anile teyet, hak tu' xin yu hechahni Komam Jesucristo yul heyanima. ¹⁶Yuxin kaw chiwalan teyet b'eyb'alnhe-we haka' inb'eyb'alan.

¹⁷Tinanh xin chinchejtojan juxhta Timoteo texol. Ha' naj ti', haka' ink'aholan ye naj, kaw xahan ay naj wuhan yeb' kaw yijem naj tet Komam Dios Jahawil. Ha' naj chinaniti inb'eyb'alan teyet yinh Komam Jesucristo, haka'tik'a chu inkuywahan xol anma ayxako yul isq'ab' Komam Dios yul hunun konhob' b'ay chinek'an.

¹⁸Ay mak texol tu' kaw chikanh isb'a, ham yalni tato matxa chinapnihan kexwila'an. ¹⁹Wal xin ta xhi Komam ayxatik'ako yinh ink'ulan intohan kexwilnojan yinh anhe. Hato tu' chiwilan tato kaw yeli helan hunteq'an eb'naj lolo' tu', maka tonhe chitzotel eb'naj xin. ²⁰Yuto

maxhtaj yu tzet chijala chi'ixtanhwiloj tato ayonhxa yul isq'ab' Komam Dios, wal xin to yu chisyelo yip Komam jinh. ²¹Wal tinanh xin, ¿tzet cheyoche chinto wub'an texol? ¿Tom cheyoche chintohan kexinhate'an yu hetx'ojal? mato ¿cheyoche ta k'ulch'an chiwute ink'ulan teyinh?

Il-lax yinh tzet eliko hune' naj ay ismul

5 ¹Xahul isq'umal wetan tato ay hune' naj texol tu' yiq'kanh iskab' mi', hune' mule tu' kaw nanxa islowi. Xol anma mach ohtanhe Komam Dios, machi b'ay chijab'e yuni haka' tu'. ²Yaja' wal hex ti' xin, kaw kanhheye cheyab'e, estam chi'ok nino b'isk'ulal yinh hek'ul yu hune' tu'. Naj uten hune' istx'ojal tu' kaw yilal heyinilo naj texol. ³Wal haninti'an waxanhka machijinan texol, yaj haka'ojtam ayinikojan texol. Yuxin yinh isb'i Komam Jesucristo chiwalan yinh tzet chi'eliko naj. ⁴Yet chekutxb'an heb'a hewatx'en hune' tu' haka'ojtam ayinikojan texol yeb' aypaxiko yip Komam Jesucristo texol. ⁵Wal hune' naj yako ismul tu' awekanto naj yul isq'ab' naj matzwalil yunhe isk'aytzelaxilo isnimanil naj, kat iskolchakano yanma naj yet chihul Komam Jesucristo.

⁶Hex ti' mach k'uloj ta cheyikanh heb'a yu hune' istx'ojal iswatx'e naj tu' texol. ¿Tom mach heyohtajo xin tato hanik'nhe yanhal ixim pan chi'ok xol ixim harina, kaw xin sunil ixim chisipk'a yu? ⁷Wal xin b'ejwekano sunil istx'ojal chexetantoj. Hak tu' xin lahanxa chexeliko haka' ixim pan lanhanto iswatx'i, machi yanhal aykoj, chiwahlax yinh q'inh Pascua. Hakexojab' tu' yul sat Komam Cristo, yuto ha' Komam yako isb'a xahanb'alil iskam yu komul, haka' chu ispotx'ni eb'naj Israel no' me' isxahanb'alo yinh q'inh Pascua. ⁸Yuxin konab'aweti iskamikal Komam Jesucristo yinh istoholal yeb' isyelal; mach yinho istx'ojal yeb' mule, yuto hunteq'an istx'ojal tu', lahan haka' yanhal pan.

⁹Yinh hune' incartahan watojan teyet waltojan tato mach chu hehunb'an heb'a yeb' mak chito ixli maka chito winajli. ¹⁰Yaja' machi waltojan tato matxa chehunb'a heb'a yeb' anma mach ohtanheho Komam Dios, machoj, yuto ha' anma tu' chito ixli maka chiwinajli, maka chito yocheko tzet ay yet anmahil, chi'elq'awi, chito ay jahno sata tioxh. Q'inalo tato ha' anma tu' chiwalan, kaw yilalmi chexel yul sat yib'anhq'inal ti', chal tu'. ¹¹Wal xin ha' hunteq'an anma chiwaltojan teyet ti' ha' ton mak chihalni ta ayxako yul isq'ab' Komam, yaja' xin chito ixli maka chito winajli yeb' chito yocheko tzet ay yul isq'ab' hunu yet anmahil, yeb' chito ay jahno sata tioxh, yeb' chito b'ahwahi yeb' chito uk'i, yeb' chito elq'awi. Hunteq'an mak haka' tu' mach chu hehunb'an heb'a yeb'i, nitam heyay tz'onhno wa'o yeb'i.

¹²⁻¹³Haninti'an mach chu walnihan yinh tzet chi'eliko anma maxhto ayoko yul isq'ab' Komam Dios, wal xin kachannhe Komam chu yalni tzet chi'elikoj. Yaja' wal hex ayexxako yul isq'ab' Komam, chu heyilni yinh

tzet chi'eliko hunu mak texol. Yuxin hune' naj issay ismul tu' iwelo naj texol.

Anma chisq'anle yinh tet naj alkal

6 ¹Hayet ay howal texol, ¿tzet yinh yuxin ha' tet eb'naj alkal yul sat yib'anhq'inal ti' chextohi yu iswatx'enayo eb'naj hune' howal tu'? ¿Tzet yinh xin maxhtaj tet yuninal Komam Dios chextohi? ²¿Tom mach heyohhtajo xin tato hanhohh ayonhxako yul isq'ab' Komam ti', hanhohh chonhok jila' yinh tzet chi'eliko anma ay yul sat yib'anhq'inal ti'? Yuxin tato chonhok jila' yinh tzet chi'eliko anma yet b'aq'inh, ¿ha' tom xin nixhte howal ch'ah texol, mach chu hewatx'enayoj? ³¿Tom xin maxhto heyohhtajopaxoj tato hanhohh ti' chonhok jila'paxo yinh tzet chi'eliko eb'naj ángel yet b'aq'inh? Hajxam tzet ye tu' yul sat yib'anhq'inal ti', ¿tom mach chu kowatx'enayo heyalni? ⁴Yuxin yet ay howal ch'ah texol, ¿tzet yinh xin sata eb'naj machi yok yinh yuninal Komam Dios chexto hewatx'eyoj? ⁵Chiwaltojan hune' ti' teyet yunhe hetx'ixwikanh. ¿Tom machi hunu mak texol chu iswatx'enayo howal ch'ah xol eb'naj juxhtaj tu'? ⁶Wal xin mach tonhe cheyaq'le howal, to cheq'anlepaxo teyinh sata eb'naj alkal, eb'naj yul sat yib'anhq'inal ti'.

⁷Hayet cheyaq'ni howal teyinh hunun hex kaw tx'oj hune' tu' yul sat Komam Dios. ¿Tzet yinh xin mach cheyaq' techahoj tato ay hunu mak chiwatx'en istx'ojal teyinh? ¿Tzet yinh xin mach cheyaq' nimank'ulal tato ay hunu mak chi'elq'anilo hunu tzet ye tu' teyet? ⁸Wal xin to hextik'a chewatx'e tzet ye tu' mach k'uloj, kat heyelq'awipaxo yinh eb'naj juxhtaj.

⁹⁻¹⁰¿Tom mach heyohhtajo xin tato mak chiwatx'en istx'ojal mach chu yok yul isq'ab' Komam Dios? Wal xin mach cheyaq' sub'chaho heb'a, yuto mak chi'ixli yeb' mak chiwinajli, yeb' mak chisjahb'a isb'a sata tioxh, yeb' mak ay yixal kat issayni hunuxa ix, yeb' mak ay yichamil kat issayni hunuxa winaj, yeb' eb'naj winaj chilauten mule yeb' yet winajil, yeb' xin mak elq'om, yeb' mak peq' melyu, yeb' mak uk'um te', yeb' mak hob'omkanh tzoti' yinh yet anmahil, yeb' mak chi'iq'ni ismelyu yinh leq'ti'al, mach chu yok yul isq'ab' Komam Dios. ¹¹Ay hex ti' hak tu' heyeko yet yalanhtokanoj, yaja' wal tinanh sajxa ye heyansa yeb' yetxa Komam Dios heyehi. Xakexok k'ulal yul sat Komam Dios yu Komam Jesucristo, yeb' yu Yespíritu Komam Dios.

Yetxa Komam Jesucristo ye konimanil

¹²Ay mak chihalni, tato chisje kowatx'en sunil tzet chal kok'ul, kaw yeli yaja' matxa jeto ye kowatx'en sunil tzet ye tu'. Haninti'an chisje inwatx'enan sunil tzet chal ink'ulan, yaja' mach chiwaq'an hamanil tet hunteq'an tu' yunhe mach chi'ok kinyijb'a'an yinh tzet chala. ¹³Aypaxo mak chalni haka' ti': «Ha' tzet chikolo yet kok'ul yehi, ha' kok'ul tu' xin

yet tzet chikolo yehi,» xhi. Yeli hakton tu' yehi, yaja' tzet chikolo tu' yeb' kok'ul tu' chi'apni istz'ayikal b'ay chitanhilo yu Komam Dios. Wal konimanil xin mach yeto ixloj maka winajlo yehi. Wal xin to yetxa Komam Jesucristo Jahawil ye konimanil ti', yetxapaxo konimanil ye Komam. ¹⁴Haka' yu yaq'ni itzitzb'okanh Komam Dios Komam Jesucristo Jahawil xol kamom, hak tu' chu konhyaq'ni itzitzb'okanh Komam yu yip.

¹⁵¿Tom mach heyohtajoj tato hune' konimanil ti' kaw yetb'ixa isb'a yeb' isnimanil Komam Jesucristo? ¿Tom xin chu jinito isnimanil Komam tu' kat kohunb'an yeb' isnimanil hunu ix ix tx'oj ye iswi'? ¡Machoj! ¹⁶¿Tom mach heyohtajo xin, tato yet chishunb'an isnimanil hunu naj yeb' hunu ix ix tx'oj ye iswi', hunxanhe anmahil chukano naj yeb' ix? Yuto chal yul Yum Komam Dios haka' ti': «Hunxanhe anmahil chukano iskawanhil,»^e xhihayoj. ¹⁷Hayet chijaniko kob'a yul isq'ab' Komam Jahawil hunxanhe chijukano yeb' Komam.

¹⁸Wal xin nannhe heyu, machojab' cheyaq' hamaniil tet ixloj maka winajloj. Tzijxanhe mule chako hunu mak, maxhtaj isnimanil chetatoj, yaja' wal mak chi'ixli maka chiwinajli, kaw ha' yinh isnimanil chako ismul. ¹⁹¿Tom mach heyohtajo xin, tato yatutxa Komam Espíritu Santo ye henimanil, Komam aq'b'il teyet yu Komam Dios yunhe yeh yul heyana? Yuxin matxa heyeto heb'a hechukil.^f ²⁰Wal xin loq'b'il hexxa yu Komam Dios, yuxin watx'ewe isk'ulal yinh henimanil, haxinwal chi'ok ismay Komam Dios heyu, yuto yetxa Komam heyehi.

Kuyb'anile yinh mohyilal

7 ¹Tinanh xin chiwatojan ispaj hunteq'an heq'amb'eb'al heyati yul hecarta wetan. K'ul tato mach chiq' eb'naj winaj yixal. ²Yaja' yunhe mach chi'ayk'ay eb'naj maka eb'ix ix yinh mule, yuxin yilal yiq'ni eb'naj yixal, yeb' yiq'nipaxo eb'ix ix yichamil. ³Naj ichamile yilal yochen naj yixal, hakpax tu' ix ixale yilal yochen ix yichamil. ⁴Yuto ix ixale matxa yeto isb'a ix ischukil, wal xin to yetxa yichamil ix yehi. Hakpax tu' naj ichamile, matxa yeto isb'a naj ischukil, to yetxa yixal naj yehi. ⁵Yuxin mach chu hemanhk'on heyochelen heb'a hunun hex, kachan tato lahti'xa ye heyu hemanhk'on heb'a teyet hunun hex yinh hayeb'o tz'ayik yu he-txahli tet Komam Dios yinh sunil heyana. Yaja' xin yilal hehunb'anpaxo heb'a hunelxa, yuto k'uxantaxka mach chitecha heyu yinh tzet choche henimanil, kat yok naj matzwalil kexyilwenoj kat heyayk'ayi kat heyaniko hemul.

⁶Hunteq'an chiwaltoti'an mach kaw chejb'anile chukanikoj, wal xin tonhe chiwaltojan teyet yu heyilni tato chu heyijeni. ⁷Wal inti'an, ay wala'an sunil mak chikan haka' weti'an, yaja' nananta konab'al

^e 6:16 Gn. 2:24 ^f 6:19 1Co. 3:16; 2Co. 6:11

hununonh yu Komam Dios. Yuto ay mak mach choche chiq' yixal, aypaxo mak mach ch'ek' yu tato mach chiq' yixal.

⁸Chiwalan tet mak maxhto chimohyi, yeb' tet eb'ix kamnaxa yichamil, k'ul tato mach chiq' yetb'i haka' weti'an. ⁹Yaja' ta ay mak mach chitecha yu ye ischukil chab'e, yilal ismohyi sata tonhe choche chi'ek' ixloj maka winajloj.

¹⁰Yaja' wal tet mak mohyinaxa xin, chiwaq'an hunteq'an chejb'anile tet, hunteq'an chejb'anile ti' mach wetojan, to yet Komam Dios yehi. Hex ixale mach chepohle heb'a yeb' heyichamil. ¹¹Yaja' tato ay hunu ix ix chispohle isb'a yeb' yichamil, matxa chu yiq'ni ix hunuxa winaj, kachanne yeb' yichamil ix tu' chisje ishunb'an isb'a hunelxa. Hakpax tu' naj ichamile, mach chu ispohni isb'a naj yeb' yixal.^g

¹²Wal tet hunmajanxa xin chiwaltojan hunteq'an ti', yaja' mach ischejb'anilo Komam Dios, to haninan chiwaltojan: Tato ay hunu naj juxhtaj maxhto chako isb'a yixal yul isq'ab' Komam Dios, yaja' tato chitzala isk'ul ix isk'atanh naj, hune' naj juxhta tu', mach chu ispohni isb'a naj yeb' ix. ¹³Yeb' xin tato ay hunu ix janab', maxhto chako isb'a yichamil yul isq'ab' Komam, yaja' chitzala isk'ul naj yeb' ix, mach chu ispohni isb'a ix yeb' naj. ¹⁴Yuto waxanhka maxhto ayoko yichamil ix yul isq'ab' Komam, yaja' hakojtam yetxa Komam Dios ye naj, yuto hunye naj yeb' hune' ix ix ayxako yul isq'ab' Komam Dios. Hakpax tu' ix maxhto ayoko yul isq'ab' Komam, hakojtam yetxa Komam Dios ye ix, yuto hunye ix yeb' hune' naj ayxako yul isq'ab' Komam. Q'inalo ta maxhto yeto Komam ye iskawanhil, lahanmi chi'eliko yuninal haka' yuninal anma maxhto ayoko yul isq'ab' Komam Dios, wal xin to haka'xa yuninal Komam Dios yehi. ¹⁵Yaja' ta naj ichamile maka ix ixale maxhto ayoko yul isq'ab' Komam tu', choche ispohle isb'a yeb' yetb'i, ispohab' isb'a. Yinh haka' tu' chikanano naj juxhtaj maka ix janab' tu' yinh aq'ank'ulal, yuto choche Komam Dios tato chexek' yinh aq'ank'ulal. ¹⁶Yuto hach ixale hach ti' maxhto hawohtajoj tato chikolcha hawichamil tu' yu isk'ulal chab'eyb'alnhe, maka hach ichamile hach ti' maxhto hawohtajoj tato chikolcha hawixal tu' yu isk'ulal chab'eyb'alnhe, wal xin k'ul ta mach chepohle heb'a.

¹⁷Wal hununonh xin, haka'tik'a jehi yet konhyawten Komam Dios, hak tu' chu koyijen yinh tzet xayaq' Komam jet. Hak tu' chejb'anil waq'an tet makta ayxako yul isq'ab' Komam yul hunun konhob'.

¹⁸Tato ay hunujex ayxako circuncisión yinh henimanil yet kexyawten Komam, mach chu heyeb'an hune' circuncisión tu'. Maka tato maxhto circuncisión teyinh yet kexyawten Komam, matxa yilalo cheyaq' circuncidar heb'a. ¹⁹Yuto ha' hune' kaw yilal yehi ha' heyijen ischejb'anil Komam Dios, machi yok yinh ta ayxako circuncisión teyinh maka machoj.

²⁰Haka'ojab' heye yet kexyawten Komam Dios yuninaloj, hakojob' tu' cheyukanoj. ²¹Tato ay hunu mak ayikto yalanh yip hunu maka yet yawtelax yu Komam, machojob' chitak isk'ul yinh hune' tu', yaja' tato ay tzet chu yelti yalanh yip hune' mak tu' kaw k'ultopaxoj. ²²Ha' mak ayikto yalanh yip hunu maka yet yawtelax yu Komam, tinanh xin yetxa isb'a ischukil yinh isyijen tzet chal Komam Dios. Hakpax tu' xin mak mach chejab'o yehi yet yawtelax yu Komam, tinanh xin ischejab'xa Komam yehi. ²³Wal xin kaw ay istohol aq'b'il hex yu Komam, yuxin mach cheyakto heb'a yalanh yip hunuxa maka. ²⁴Tinanh xin, hex wuxhtaj hex wanab', ha' yul sat Komam Dios k'ul kokankano haka'tik'a jehi yet konhyawten Komam Dios yuninaloj.

²⁵Wal mak maxhto mohyinaoj machi chejb'anile yaq'kano Komam wetan yinh, wal hunteq'an chejb'anile ti', haninan chiwaltojan, yaja' yilal kaw ay yelapno yul hesat, yuto yu isk'ulal isk'ul Komam Dios winhan yuxin yaq' hune' inmuntli'an yinh inkuywahan. ²⁶Yul wetan, tato ay hunu naj maxhto yixal, k'ul ta mach chiq' naj yixal, yuto hunteq'an tiempo b'ay ayonh tinanh kaw ya'taxa.

²⁷Ha' mak ayxa yixal, machojob' chispoh isb'a yeb' yixal. Ha' mak maxhto yixal, k'ul ta mach chissay yixal. ²⁸Tato ay hex chexmohyi, mach muleho hune' tu'; taka hunu ix q'opo chimohyi xin, mach tx'ojo-paxo hune' tu'. Yaja' wal mak chimohyi kaw ay isya'tajil chila. Ay wala'an mach chaq'le hunteq'an isya'tajil tu'.

²⁹Hex wuxhtaj, hex wanab', ha' chalilo hunteq'an chiwaltoti'an to hanik'xanhe tiempo ayonhik'oj, yuxin hex ay heyixal, machojob'nhetaj yinh heyixal cheyako henab'al, wal xin yilal heyaq'ni hamanil yinh yet Komam. ³⁰Haxa mak b'isk'ulal ye xin, haka'ojtam mach b'isk'ulalo yehi, haxa mak ayko yinh tzalahilal xin, haka'ojtam mach tzalahilalo yehi. Ha' mak chiloq'ni hunu tzet ye tu' haka'ojtam mach yeto tzet chisloq' tu'. ³¹Haxa mak chi'okniko tzet ay yul sat yib'anhq'inal ti' yu, haka'ojtam mach lanhan yocheni yuto hune' yul sat yib'anhq'inal ti' chitanhiloj.

³²Ay wala'an matzet cheyako yinh hek'ul. Yet maxhto chiq' yixal hunu naj tzeh, yinhnhe yet Komam ayko yanma naj, hanhe tzet chal Komam ha' chisyije naj. ³³Wal hunu naj ayxa yixal xin, haxa yinh tzet ay yul sat yib'anhq'inal ti' ha' chako yinh isk'ul, yeb' yinh tzet chu yaq'ni tzalaho isk'ul yixal. ³⁴Hakpax tu' eb'ix q'opo maxhto chimohyi yeb' eb'ix maxhtik'a yichamil, ha' yinh yet Komam b'ay ayko yanma eb'ix yeb' sunil isnab'al. Wal eb'ix ay yichamil xin, ha' tzet ay yul sat yib'anhq'inal ti', yeb' tzet choche yichamil, ha' ayko yinh isk'ul eb'ix iswatx'eni.

³⁵Chiwalan hunteq'an ti', yaja' maxhtaj yu kexinkachnihan, to yu isk'ulalo teyinh, yeb' yu heb'eyb'alnhen haka' choche Komam Dios, kat hemunla yinh ismunil Komam yinh sunil heyanna.

³⁶Ta ay hunu naj juxhta choche chimohyi yeb' hunu ix janab' yuto is-tiempohalxa yiq'ni yixal, chisje ismohyi, mach tx'ojo hune' tu'. ³⁷Yaja' xin

ta ay hunu mak mach chisje isk'ul chiq' yixal, chixin ist'inhb'ako yinh yanma yek' yu ischukil, q'ak'ul ta mach chimohyi. ³⁸Yuxin ta chimohyi hune' mak tu', k'ul, yaja' ta mach chimohyi xin, ek'b'al k'ultopaxoj.

³⁹Yet itzitzto yichamil hunu ix ix, aytokto ix yalanh ischejb'anil yichamil. Yaja' ta chikam naj xin kaw yetxa isb'a ix ischukil, xa'isje ismohyi ix yeb' mak b'ay chal isk'ul, yaja' tanhe yeb' hunu mak ayxako yul isq'ab' Komam. ⁴⁰Yaja' wal intxumnihan, ek'b'alto saq'al yet ix ta mach chiq' yichamil ix. Hak tu' chiwute walnihan yuto ha' hun Komam Espiritu Santo ayko wetb'ihojan, ha' ch'aq'ni wala'an.

No' chib'e chi'aq'lax yinh xahanb'alil tet tiohx

8 ¹Wal tinanh xin, chiwaltojan teyet yinh no' chib'e chihaltelax tet ej tiohx. Hunteq'an ti' kaw johta kosunil, yaja' kohelanil tu' ay ismay jinikanh kob'a yu. Wal ta xahan chijil kob'a hununonh, chonhch'ib' yinh yet Komam haka' tu'. ²Tato ay hunu mak kaw ay isnab'al chute istxumni, maxhto isnab'al hune' mak tu' yinh haka' kaw yelapno yehi. ³Wal mak ayko yanma yinh Komam Dios, kaw ohtab'il yu Komam.

⁴Wal yinh isk'uxlax no' chib'e chi'aq'lax yinh xahanb'alil tet ej tiohx, kaw matzet chaliloj yuto hunteq'an tiohx tu' kaw johtaj tato kaw machi yelapno ye yul sat yib'anhq'inal ti', yuto hune'nhech'an Komam Dios.

⁵Yaja' waxanhka xin ay mak chihalni ta ay tx'i'al dios satkanh, yeb' yul sat yib'anhq'inal ti', yinh haka' tu' tx'i'al dios yeb' tx'i'al yahaw yul sat eb'naj. ⁶Yaja' wal hanhoh ti', hune'nhech'an koDiosal, ha' ton Komam Dios mame. Ha' Komam tu' yicheb'anil sunil tzet ye tu', yetpaxo Komam je hanhoh ti'. Hune'nhech'anpaxo Jahawil, ha' ton Komam Jesucristo. Yu Komam tu', yuxin ay sunil tzet ye tu', yeb' yu Komam yuxin ayonh.

⁷Yaja' mach sunilo eb'naj juxhta chinachalo hune' ti' yu. Yuto ay eb'naj chitik'a yiyo isb'a tet tiohx yet yalanhtokanoj, yuxin yet chisk'uxni eb'naj no' chib'e halteb'ilxa yinh xahanb'alil tet tiohx tu', chito kab'kon isk'ul, chistxumni eb'naj ta ch'etaxto eb'naj yu. ⁸Yaja' maxhtaj yu tzet chikolo, yuxin chonhkan k'ulal yul sat Komam Dios, maxhtaj yu kok'uxni no' chib'e tu', yuxin chonhk'ulb'iloj, maka yu mach chikolo yuxin chonhkan tx'ojal.

⁹Kaw cheyil heb'a, tajka yu chisje heloni yuxin cheyaq' ayk'ayo hunu mak maxhto yip yinh yet Komam. ¹⁰Tajka yu heyoytaxa ta mach txahulo hek'uxni no' chib'e tu', yuxin chexay tz'onhno wa'o yul yatut tiohx, yaja' ta ay eb'naj juxhta chexilni yinh haka' tu', mach ismunil hex kaw hex cheyijb'a eb'naj isk'uxni no' chib'e halteb'il tet tiohx tu'. ¹¹Ta hak tu' cheyute, cheyaq' ayk'ayo hunu mak maxhto yip yinh yet Komam, wal xin ha' yinh hune' mak tu' kampaxo Komam Jesús. ¹²Yuxin tato heyu yuxin chi'etaxto isnab'al hunu heyuxhta maxhto yip yinh Komam, cheyako hemul yinh haka' tu' yul sat Komam Jesucristo. ¹³Yuxin ta yunhe

ink'uxnihan no' chib'e yuxin chiwaq' ayk'ayojan hunu wuxhtajan, q'ak'ul tom mach chink'uxan no' chib'e tu', haxinwal machi hunu mak chako ismul wuhan.

Hunteq'an yinh b'ay ay yok eb'ya' ischejab' Komam Jesucristo

9 ¹Yinh kaw yeli haninti'an ischejab' Komam Jesucristo wehan yuto wilpaxojan Komam, yuxin lahan welapnojan haka' eb'ya' ischejab' Komam. Hex ti' xin ayexxako yul isq'ab' Komam Jesucristo, yaja' yu immunilan texol. ²Waxanhka ay mak chalni tato mach ischejab'o Komam Jesucristo wehan, yaja' wal hex ti' xin kaw heyohtaj tato ischejab' Komam wehan, yuto yu immunilan texol yuxin ayexxako yul isq'ab' Komam. Ha' chalni loj tato kaw yeli ischejab' Komam wehan.

³Hak ti' chu inpajtzenan tet eb'naj chitzotel winhan. ⁴Haninti'an ay wokan yinh inchahnihan tzet chinlohan yinh immunilan texol. ⁵Q'inalo ta ay hunu ix janab' chi'ok wixalojan tinanh, ¿tom mach chu winik'ojan ix wintajan haka' chu ya' Pedro yeb' hunteq'anxa eb'ya' ischejab' Komam Jesucristo, yeb' eb'ya' yuxhta Komam? ⁶¿Tom haninxanhehan yeb' ya' Bernabé mach chi'aq'lax tzet chi'okniko juhanh yet chonhmunlahanh yinh Istzoti' Komam Dios? ⁷Haka' eb'naj soldado tinanh, ¿tom yinh eb'naj ayko tzet chi'okniko yu? Haka'paxo hunu naj chitz'unni te' uva, ¿tom mach chislo naj hunu sat te' xin? Haka'paxo hunu naj tanhem wakax, ¿tom mach chuk' naj yal yim no'? ⁸Tajka chetxumu tato haninnhehan chiwalan hune' ti', wal xin hak tu' yalnipaxo yinh isley ya' Moisés. ⁹Yinh ley tu' tz'ib'nheb'ilkano haka' ti': «Mach cheyako tz'ispa yinh isti' no' wakax yet chixanhwi trigo no',»^h xhihayoj. Yaja' maxhtaj no' wakax ayko yinh isk'ul Komam yet yalni hune' tu'. ¹⁰Wal xin hanhonh ayonhiko yinh isk'ul Komam yet yalni hune' tu'. Yuxin haka' naj t'okom tx'otx' yeb' naj chixanhnilti ixim trigo, ha' ismunil eb'naj tu' ayko yipo yanma, yuto yinh ismunil eb'naj tu' chi'el tzet chislo. ¹¹Hanhonhti'anh kotz'unanh Istzoti' Komam Dios texol, yuxin mach tx'ojoj ta cheyaq' hanik' tzet chi'okniko juhanh. ¹²Ta ha' hunmajanxa eb'naj chi'ek' texol cheyaq' tzet chi'okniko yu, hajonhxamanh ay yilal kochahni jetanh.

Yaja' xin machi hunelo koq'ananh teyet, kaw tonhe jillehanh yunhe mach chi'ok linhno jalnik'ojanh Istzoti' Komam Jesucristo. ¹³Hex ti' heyohtaj tato eb'ya' chimunla yul Yatut Komam Dios, ha' tzet chihaltelax tet Komam yul yatut tu', ha' chi'aq'ni ek'o yu eb'ya'. Ha' chal yelapno tu', to ya' sacerdote chi'aniko xahanb'al tet Komam Dios, ay yok ya' yinh tzet lanhan yalten tu'. ¹⁴Hakton tu' ye eb'ya' chimunla yinh yalnik'o Tzoti' yet kolb'anile, halb'ilkano yu Komam Dios tato yilal yaq'lax tzet chi'okniko yu eb'ya' yinh hune' munil b'ay chimunlako tu'. ¹⁵Wal haninti'an xin,

^h 9:9 Dt. 25:4

machi hunelo inq'anan teyet yinh tzet okniko wuhan waxanhka xin kaw yilal inchahnihan. Yaja' maxhtaj yu heyaq'ni yuxin chintz'ib'nhetojan hune' carta ti' teyet, wal xin ay hune' intzalahilalan yuto machi hunu tzet ye tu' inq'anan teyet. Q'a'k'ulmi chinkaman sata inq'annihan hunu tzet ye tu' teyet.

¹⁶Haninti'an mach chinlolo'nhe hinb'ahan yu chiwalik'ojan Tzoti' yet kolb'anile tet anma, yuto chejb'il hinan walnik'ojan. Kaw k'anch'aninan ta mach chiwalan Tzoti' yet kolb'anile. ¹⁷Q'inalo ta yul wetan chiwitijan wek'an walnok'ojan, kaw yilalmi inchahnipaxojan intoholan. Wal xin chiwalik'ojan yuto ha' Komam Dios aq'nhe hune' inmunilti'an. ¹⁸Wal xin, ha' hune' ispaj yet chinek'an walnok'ojan Tzoti' yet kolb'anile ha' ton tzalahilal. Machi intoholan chinq'anan, waxanhka yet ay inq'annihan intoholan yinh inmunil tu'an yu yek' wuhan.

¹⁹Mach ayinikojan yalanh yip hunu maka, yaja' xawako hinb'ahan haka' chejab' tet sunil anma, yunhe kaw tx'i'al anma chi'okkano yul isq'ab' Komam wuhan. ²⁰Yet chinek'an xol eb'naj wet konhob' Israelan, haka' isb'eyb'al eb'naj tu' hak tu' chiwute inb'eyb'alan, yunhe yok haywanho eb'naj yul isq'ab' Komam, kat yelkanti eb'naj yalanh ley, yuxin haka'tanhe chiwakto hinb'ahan yalanh isley ya' Moisés. Yaja' yinh kaw isyelal mach ayiniktojan yalanh ley tu'. ²¹Hakpax tu' yet chinek'an xol anma mach Israeloj, anma mach ayokto yalanh isley ya' Moisés, haka' isb'eyb'al eb'naj tu' hak tu' chiwutepaxo hinb'ahan, yunhe yok haywanho eb'naj yul isq'ab' Komam. Yaja' yinh kaw isyelal yalanh ischejb'anil Komam Dios ayiniktojan, yuto yijem hinan yinh ischejb'anil Komam Jesucristo.

²²Haxa yet ayinikojan xol eb'naj maxhto b'in yip yinh yet Komam xin, haka'tanhe hunu mak machi yip, hak tu' chiwute hinb'ahan, yunhe kaw yiq'ni yip yanma eb'naj yinh Komam. Wal xin wute hinb'ahan haka' anma tu', yunhe ischahnikano iskolb'anil haywanho anma tu'. ²³Yu kuyb'anile yet kolb'anile, yuxin hak tu' wute hinb'ahan, yunhe ha' huninan chinchahan isk'ulal yu.

²⁴Haka' yinh hunu anhe tinanh, tx'i'al mak chaq' anhe, yaja' hune'nhe mak chi'iq'wahi. Tinanh xin, haka' chu eb'naj ch'aq'ni anhe tu', hakojab' tu' cheyute heb'a yinh yet Komam, haxinwal chechah ispaj selel. ²⁵Sunil eb'naj chaq' anhe, yet chiskuyni isb'a eb'naj kaw kam chil eb'naj ta machi hunu tzet ye tu' chi'etanto isnimanil eb'naj yunhe yiq'ni eb'naj ismatan yet chiyaq'ni eb'naj anhe. Yaja' hune' matan chiq' eb'naj tu' pet chi'etaxtoj, wal hune' matan chijiq' hanhoh ti' yinh ismunil Komam, machi b'aq'inh chi'etaxtoj. ²⁶Haka' eb'naj chaq' anhe tu' chaq' yanma eb'naj yapni b'ay chi'aq'lax ismatan, hak tu' wehan haninti'an. Haka'paxo eb'naj chi'alaxiko yaq'lano howal hakintu'an, mach nab'nheho chi'elto inq'ab'an. Wal xin yinh kaw sunil wanmahan chinmunlahan yinh ismunil Komam Dios. ²⁷Kaw chinkachan innimanilan, chiwanikojan isyijeno yinh tzet chiwochehan,

yuto k'uxantaxka lahwi wawtenan anma yul isq'ab' Komam Dios, haxataxka chi'elikoj matxa chinchahan ispaj selet tzet tzumb'eb'il wuhti'an.

Mach chu jinayo kob'a tet ej tiohx

10 ¹Hex wuxhtaj hex wanab', chiwochehan mach chenahulnheto yinh tzet yaq'le eb'naj jichmam yet yijb'alaxik'o eb'naj yu ya' Moisés yet payat. Sunil eb'naj b'elwi yalanh hune' moyan, yeb' xin sunil eb'naj ek'paxto yiktab'al ha' Kajinh Mar.ⁱ ²Haka'tanhe ahkano ha' iswi' eb'naj ishunikniko yinta ya' Moisés yu hune' moyan tu', yeb' yet yek'to eb'naj yiktab'al ha' mar tu', haka'tanhe ahkano ha' iswi' eb'naj. ³Is-lohnpaxo eb'naj hunteq'an tzet chilolax yati Komam Dios yul satkanh.^j ⁴Yeb'paxo xin sunil eb'naj uk'ni ha ha' yaq' Komam Dios elti yinh isk'ul hune' ch'en ch'en. Ha' hune' ch'en ch'en tu' yechel Komam Jesucristo ye ch'en, ha' hun Komam tzujuan yinta eb'naj jichmam yinh isb'el.^k ⁵Wax-anhka yaq' Komam Dios hunteq'an tu' tet eb'naj, yaja' ay eb'naj mach isyije yinh tzet yal Komam Dios, yuxin kaw tx'i'al eb'naj kami, iskankano pak'no isnimanil eb'naj sat tx'otx' desierto yinh isb'el tu'.

⁶Sunil hunteq'an yu eb'naj tu' kokuyb'anil yukanoj yunhe matxa chijocheko istx'ojal haka' yu eb'naj. ⁷Mach cheyiyo heb'a tet ej tiohx haka' yu tx'i'al eb'naj tu', haka' yekano istzoti'al eb'naj yul Yum Komam Dios haka' ti': «Ay tz'onhno eb'naj, yok eb'naj wa'oj yeb' uk'uj. Lahwi tu' xin yah b'ulna eb'naj, yok eb'naj kanhalwoj, yaq'ni eb'naj tzet chal isk'ul,»^l xhihayoj. ⁸Machojab' chexixli haka' yu tx'i'al eb'naj tu'. Yu hune' tu' yuxin tanhilo 23 (oxeb' iskawinaj) mil eb'naj yinh hune' tz'ayik. ⁹Machojab'paxo xin cheyako Komam Jesucristo yinh ilweb'al, haka' yu anma tu'. Yu hune' tu' yuxin kaw tx'i'al mak chilax yu no' lab'a, iskamiloj.^m ¹⁰Machojab' chexb'uchwa yinh Komam Dios haka' yu anma tu'. Yu hune' tu' yuxin tx'i'al mak kam yu naj ángel aq'omkamo anma.

¹¹Sunil hunteq'an tzet yu eb'naj jichmam tu', kuyb'anile yekano jinh tinanh, tz'ib'nheb'ilpaxkanayoj yunhe johtanheni ta mach chu kowatx'en istx'ojal, yuto hanhonh ti' ayonhxako yinh islahob'al tz'ayik ti'.

¹²Yuxin ha' mak kaw k'ul yeko chab'e, yilal kaw kam chil isb'a haxinwal mach chi'ayk'ayi. ¹³Tzijxanhe ilweb'al chilaay jib'anh, lahan haka' ilweb'al chi'ay yib'anh sunil anma. Yaja' chikawxi kok'ul yinh Komam Dios tato mach chischayo Komam hunu ilweb'al jib'anh mach chitecha ju. Wal xin, hayet chi'apni ilweb'al jinh, ha' Komam chiyeni jet tzet chu kolkolcha tet ilweb'al tu', hak tu' xin chu istecha ju.

¹⁴Tinanh xin hex wuxhtaj hex wanab', hex xahan ay wuhan, mach cheyiyo heb'a tet ej tiohx. ¹⁵Chiwaltojan hunteq'an ti' teyet yuto kaw

ⁱ 10:1 Ex. 14:22-29 ^j 10:3 Ex. 16:35 ^k 10:4 Ex. 17:6; Nm. 20:11 ^l 10:7 Ex. 32:6
^m 10:9 Nm. 21:5-6

helanexxa, chisje heyok heyilnoj ta k'ul hunteq'an chiwaltoti'an. ¹⁶ Yet chijek'tzen santa cena chijaq'ni yuch'andiosal yinh tzet ayayto yul ch'en vaso kat juk'ni, ha' chiyeniloj tato hunxanhe je yeb' Komam Jesucristo yu ischik'il. Haxa yet chikoq'axponayo ixim pan kat kowahni ixim, ha' ch'aq'ni konab'a' tato hunxanhe chonhelkaniko yinh Komam Jesucristo. ¹⁷ Waxanhka kaw tx'i'alonh, yaja' hune'nhe ha' ixim pan chikowah kosunil, ha' chiyeniloj tato hunxanhe nimanile je kosunil.

¹⁸ Naweti yinh konhob' Israel, hayet chisk'uxni eb'naj no' chib'e chi-aq'lax yinh xahanb'alil tet Komam Dios, hunxanhe chukano eb'naj yinh Komam. ¹⁹ Yaj mach lanhano walnihan tato ay yip tiohx, yeb' ta ay tzet chal yelapno no' chib'e chihaltelax tet. ²⁰ Ha' chalilo hune' chiwalti'an, to hayet chaq'ni eb'naj mach Israelo isxahanb'al, maxhtaj tet Komam Dios chalte eb'naj isxahanb'al tu', wal xin to ha' tet eb'naj ischejab' naj matzwalil chalte eb'naj isxahanb'al. Ha' hune' ti' machojab' cheyako heb'a yetb'iho eb'naj ischejab' naj matzwalil. ²¹ Mach chu juk'ni tzet ay yul isvaso Komam Dios kat juk'nipaxo tzet ay yul isvaso eb'naj ischejab' naj matzwalil. Mach chu jokpaxo tz'onhno wa'o sat ismexha Komam Dios, chilahwi tu' kat jokpaxo tz'onhno wa'o sat ismexha eb'naj ischejab' naj matzwalil. ²² Wal xin machojab' chikowatx'e hunteq'an tu', haxinwal mach chijaq'tij ishowal Komam jinh yuto mach ek'b'alo jip yib'anh Komam.

Mach chu jetanto is nab'al hunuxa anma

²³ Ay mak chihalni: «Chisje kowatx'en sunil tzet chal janma,» xhi. Kaw yeli, yaja' hanhoh ti' matxa jeto ay kowatx'en hunteq'an tu'. Chu kowatx'en sunil tzet chal kok'ul, yaja' mach sunilo chikolwa jinh konhyaq'ni ch'ib'o yinh yet Komam Dios. ²⁴ Machojab'nhetaj isk'ulal jet chikosayik'oj, wal xin yilal kosayni isk'ulal yinh jet anmahil.

²⁵ Sunil no' chib'e chitxonhlay yul txonhb'al chu hek'uxni no', mach yilalo cheq'amb'e tzet ye no' haxinwal mach chikab'kon heyanna hek'uxni no'. ²⁶ Yuto hune' yul yib'anhq'inal ti', yeb' sunil tzet ayayo sat, yet Komam Dios yehi.

²⁷ Tato chexawtelax wa'o yu hunu mak maxhto ayoko yul isq'ab' Komam, chu hetohi. Ta chisje hek'ul, chu hek'uxni no' chib'e chi'alaxayo yinh hesat. Mach cheq'amb'e tzet ye no' haxinwal mach chikab'konkanh heyanna yet chek'uxni no'. ²⁸ Yaja' ta ay mak chalni haka' ti': «No' chib'e ti' xa'aq'lax no' yinh xahanb'alil tet tiohx,» ta xhi, mach chek'ux no', yu isk'ulalo yinh hune' mak chalni tu'. ²⁹ Chiwaltojan hunteq'an ti' yunhe mach chi'etaxto is nab'al hune' mak maxhto yip is nab'al tu', maxhtaj yu henab'al hex ti'.

Yaja' ayexmi chetxum haka' ti': «Tzet yinh yuxin chinkach hinb'ahan ink'uxnihan no' chib'e chi'aq'lax yinh xahanb'alil tu' yu anma chinanon

isk'ul isk'uxni no'? ³⁰Ta chiwaq'an yuch'andiosal yinh no' chib'e chink'ux tu'an, matxa mak chu yok b'uchwal yinh hune' tu',» kexchimi.

³¹Wal xin chivalan teyet, ta ay hunu tzet ye tu' cheloh yeb' cheyuk'u, maka hunuxa tzet ye tu' cheyu, ha'ojab' ismay Komam Dios cheyako yinh tzet chewatx'e tu'. ³²Wal xin machojab' cheyetato isna'b'al eb'naj Israel maka eb'naj mach Israeloj, maka makta ayxako yul isq'ab' Komam Jesucristo yu tzet chewatx'e. ³³Haka' haninti'an, kaw chiwaq' wanmahan inwatx'enan isk'ulal sata anma, maxhtaj isk'ulal wetan chinsayik'ojan, to isk'ulal yet anma, yunhe istzujcha apno isk'olb'anil anma yu.

11 ¹Okanhwe tzujno yinh inb'eyb'alti'an, haka' chiwute inb'eyb'al-nhehan isb'eyb'al Komam Jesucristo.

Kuyb'anile yinh eb'ix ix yet ay culto

²Hex wuxhtaj hex wanab', kaw chintzalahan teyinh, yuto yinh sunil tzet chewatx'e chinhenatijan, yeb'paxo kaw ayexiko heyijen hunteq'an kuyb'anile waq'an teyet. ³Chiwochehan cheyohtanheloh ta Komam Jesucristo, ha' kaw ayko iswi'ehalo eb'naj winaj. Haxa naj ichamile xin, iswi'ehal yeko naj yinh yixal, haka'paxo Komam Dios iswi'ehal yeko Komam yinh Komam Jesucristo. ⁴Tato chako eb'naj winaj yenhel iswi' yet chitxahli eb'naj, maka yet chalni eb'naj tzoti' chitit tet Komam Dios, yinh haka' tu' chiyilo eb'naj ispixan Komam Jesucristo, Komam ayko iswi'ehalo yinh eb'naj. ⁵Haka'paxo eb'ix ix, ta ay hunu ix mach chahto yenhel iswi' yet chitxahli, maka yet chalni tzoti' chitit tet Komam Dios, yinh haka' tu', ha'tik'a ix chi'inilo ispixan yichamil, naj ayko iswi'ehalo yinh ix. Lahan chalilo haka'tanhe xayaq' elo ix xil iswi'. ⁶Yuxin ta ay hunu eb'ix ix, mach chahto yenhel iswi', k'ulmi yaq'ni eb'ix elo xil iswi', yaja' ta tx'ixob'al hune' tu' chab'e eb'ix xin, yaq'ab'ahto eb'ix yenhel iswi'.

⁷Wal hanhoh winajonh ti' xin, mach k'uloj ta chijahto yenhel kowi', yuto yechel Komam Dios jehi yeb' hanhoh chikoyelo yip Komam Dios. Haxa eb'ix ix xin, ha' eb'ix chiyenilo yip eb'naj winaj. ⁸Yuto yet iswatx'en Komam Dios naj winaj, mach yinho ix ix el naj yu Komam. Wal xin to ha' ix ix tu' yinh naj winaj elna ix yu Komam. ⁹Maxhtaj yu ix ix yuxin iswatx'e Komam Dios naj winaj, wal xin to yu naj winaj yuxin iswatx'e Komam ix ix. ¹⁰Yu hune' tu', yuxin yilal yanahto eb'ix ix yenhel iswi' yu isyenilo eb'ix tato ayikto eb'ix yalanh ischejb'anil yichamil, yuto t'anhani-ko eb'naj ángel jinh.

¹¹Yaja' walxa yinh Komam Dios, machim naj winaj ta machi ix ix, machimpaxo ix ix ta machi naj winaj. ¹²Kaw yeli, yinh naj b'ab'el winaj elna ix b'ab'el ix. Walxa tinanh xin, yinhxa ix ix chipitzk'a naj winaj. Yaja' sunil tu' yu Komam Dios yuxin hak tu' yehi.

¹³Yuxin txumwej, ¿k'ulmi istxahli hunu ix ix yet machi yenhel iswi' ix chahtoj? ¹⁴Kaw johtaj tato kaw tx'ixob'al yaq'ni ch'ib'o eb'naj winaj

xil iswi'. ¹⁵Yaja' wal eb'ix ix xin, kaw istzan eb'ix yaq'ni ch'ib'o xil iswi', yuto xil iswi' eb'ix tu' haka' yenhel iswi' eb'ix yekoj. ¹⁶Tato ay mak chi'ok tzotelo yib'anhilo hune' ti', yohtanhehojab'iloj tato hanhonhti'anh yeb' sunil mak ayxako yul isq'ab' Komam Dios yul hunun konhob', mach chichahlah txahlo hunu ix ix ta machi yenhel iswi' ix chahtoj.

Mach chiyjelax santa cena haka' kaw yelapno yehi

¹⁷Yinh hunteq'an chiwaltojan teyet ti', mach chintzalahan teyinh, yuto hayet chekutxb'aniko heb'a, kaw machi nino isk'ulal chechah, wal xin kaw tonhe cheyetato heb'a. ¹⁸Yinh b'ab'elal chiwaltojan teyet ta xawab'ehan ta hayet chekutxb'an heb'a yinh culto tolab' chepohle heb'a, yaja' yet chintxumnihan etzanhem kaw yel hune' tu'. ¹⁹Yaja' etza kaw yilal chepohle heb'a, yunhe yixtanhwiloh mak kaw yel chala ayxako yul isq'ab' Komam Dios.

²⁰Wal xin yet chekutxb'an heb'a, matxataj santa cena cheyek'tze, ²¹yuto yet chi'apni yorahil hewa'i nanantaxanhe heb'ab'ik'o heloni tzet cheloh, yuxin ay hex mach chinoh hek'ul, ayexpaxo xin chexuk'ikano-kanh. ²²¿Tom machi heyatut b'ay chexwa' xin? ¿Tzet yinh xin cheyilo ispixan mak ayxako yul isq'ab' Komam Dios, kat heyanikaniko yinh tx'ixwilal mak matzet aya? ¿Chimkintzalahan yinh hune' heb'eyb'al tu' heyalni? Wal xin kaw mach chu intzalahan yinh.

Issanta cena Komam Jesucristo

(Mt. 26:26-29; Mr. 14:22-25; Lc. 22:14-20)

²³Hune' kuyb'anil chiwapaxtojan teyet ti', ha' tet Komam Jesucristo Jahawil chab'ilkano wuhan. Ha' yinh hune' aq'b'al yet yalaxiko Komam yul isq'ab' kamikal, yikanh Komam ixim pan, ²⁴lahwi yaq'ni Komam yuch'andiosal yinh ixim, isq'axponayo ixim, yalni Komam: «Chahwej kat hewahni, hune' ti' yechel innimanilan chiwaq'an yinh kamikal yu hekolchahi. Hunta el yet cheyek'tzen hune' ti' chinhenanitijan,» xhikano Komam. ²⁵Lahwi tu' yinipaxokanh Komam ch'en vaso, yalni Komam: «Hune' ayayto yul vaso ti' yechel inchik'ilan chimaltoj, ha' xin chit'inh-b'ankano hune' ak'trato chaq' Komam Dios. Hunta'el yet cheyuk'ni hune' ti' chinhenatijan,» xhi Komam. ²⁶Yuxin hunta el yet chikowahni ixim pan tu', yeb' yet chijuk'ni tzet ayayto yul hune' vaso tu', ha' iskamikal Komam Jesucristo chikoyeloh masanto yet chul Komam hunelxa.

Kuyb'anile yinh yalanhto maxhto chikochah santa cena

²⁷Yuxin ta ay hunu mak matzet chal yelapno ixim pan tu' yul sat yet chiswahni, yeb' yet chuk'ni tzet ayayto yul vaso yet Komam, chako ismul yinh isnimanil Komam Jesucristo, yeb' yinh ischik'il Komam. ²⁸Yuxin hayet yalanhto maxhto chewah hune' pan tu' yeb' heyuk'ni tzet ayayto

yul hune' vaso tu', kaw yilal hetxumni yinh tzet heyeko hunun hex.
²⁹Yuto ta chewah hune' pan tu' yeb' ta cheyuk' hune' ayayto yul vaso tu', machi xin k'ulo heyekoj, yeb' xin mach chenah ta haka' isnimanil Komam yehi, yinh hak tu' chijiti isya'tajil teyib'anh. ³⁰Yu hune' tu', yuxin ay mak ya'ay texol, aypaxo mak tz'ontanhe, yeb'paxo xin ay mak xakami. ³¹Wal xin ta chikotxum kob'a yinh tzet jeko hununonh, machim chi'ay isya'tajil jib'anh yu Komam Dios. ³²Yaja' ta mach chikotxum yinh tzet jeko yul sat Komam, chayo Komam isya'tajil jib'anh, yunhe mach chonhto yinh isya'tajil xol hunteq'an anma k'aynatoj.

³³Yuxin hex wuxhtaj hex wanab', yet chekutxb'an heb'a hechahni santa cena tu', yilal cheyechmale heb'a hewahni. ³⁴Yaja' ta ay hunu mak kaw xanhohchahi chisje iswa'kano b'ey yatut, haxinwal mach chayo Komam isya'tajil teyib'anh yinh tzet mach toholo chewatx'e yet chetkutx-b'an heb'a tu'. Wal yinh hunteq'anxa xin, yetto chinapnihan texol kat kexinwatx'enikojan yinh.

Munil chi'aq'lax jet hununonh yu Komam Espíritu Santo

12 ¹Hex wuxhtaj hex wanab', chiwochehan cheyohtanhelo yinh hunteq'an komunil chi'aq'lax jet hununonh yu Komam Espíritu Santo.

²Kaw heyohtaj ta yet maxhto chexok yul isq'ab' Komam Dios, kaw tzujan hexto yinta hunteq'an tiohx mach chitzoteli. ³Wal tinanh xin, chi-waq'an heyohtanhelohj tato ha' mak chalni haka' ti': «Yaq'ab'ti ishawal Komam Dios yib'anh naj Jesús,» ta xhi. Ha' mak chalni haka' tu', maxhtaj Komam Espíritu Santo chi'aq'ni yala'. Yaja' wal mak chalni haka' ti' xin: «Komam Jesús ha' wahawilan,» ta xhi. Hune' mak tu' ha' Komam Espíritu Santo chi'aq'ni yala'.

⁴Hanhonh ti' nananta komunil hununonh yinh Komam, yaja' hune' mak chi'aq'ni jet, ha' ton Komam Espíritu Santo. ⁵Kaw nananta komunil hununonh, yaja' hune'nhe mak b'ay chonhmunla kosunil, ha' ton Komam Jesucristo. ⁶Nananta tzet chikowatx'e hununonh, yaja' hune'nhe Komam Dios chi'aq'ni hunteq'an tu' jub'.

⁷Chisyelo Komam Espíritu Santo tato ayko yul janma hununonh chaq'ni Komam isk'ulal jet, yu isk'ulalo yinh eb'naj juxhtaj yeb' eb'ix janab'. ⁸Yu yip Komam Espíritu Santo yuxin ay eb'naj juxhta kaw ay ishelanil istzoteli, aypaxo mak kaw ay isnab'al iskuywahi, yaja' yutik'a-paxo Komam Espíritu. ⁹Yu Komam Espíritu Santo tu', yuxinto ay eb'naj kaw chikawxi isk'ul yinh Komam Dios, aypaxo eb'naj chi'aq'lax yip yu Komam Espíritu Santo yaq'ni kawxo makta ya'ay. ¹⁰Ay eb'naj chi'aq'lax yip isyeni k'ayb'alk'ule, aypaxo eb'naj chi'aq'lax ishelanil yalnik'o tzoti chitit tet Komam Dios. Aypaxo eb'naj xin chi'aq'lax ishelanil yohtanh-eniloj tato ha' Komam Espíritu Santo ayko yetb'iho hunu maka, maka

tato yespíritu naj matzwalil ayko yetb'ihoj. Ay eb'naj chaq'paxo Komam Espíritu Santo ishelanil yalni nan ab'xub'al, aypaxo xin eb'naj chaq' Komam Espíritu Santo ishelanil istxumnilo hunteq'an nan ab'xub'ale tu'.¹¹ Sunil hunteq'an ti' ha'tik'a Komam Espíritu Santo chi'aq'ni kowatx'e' hununonh, hatatik'a tzet choche Komam yaq'a' jet. Kaw xin hunch'annhe Komam Espíritu.

Kaw hunxanhe nimanilehal jehi

¹²Haka' konimanil ti', waxanhka kaw tx'i'al yiq'ni isb'a, yaja' hune'-nhe nimanilehal yehi. Hak tu' ye Komam Jesucristo. ¹³Haktik'apax tu' je hanhonh ti', waxanhka Israel honh, maka mach Israelo honh, waxanhka chejab'onh, maka jet kob'a kochukil, hune'nhe Komam Espíritu Santo konhhunb'an yinh Komam Jesucristo, yuxin hune'xanhe nimanilehal jehi. Yaq'lax xin Komam Espíritu yul janma hununonh.

¹⁴Haka' ye konimanil tinanh, kaw tx'i'al yiq'ni isb'a, yaja' hune'-nhe nimanilehal. ¹⁵Q'inalo ta chu istzotel joj kat yalni: «Haninti'an manq'ab'ehojan, yuxin machi wokan yinh hune' nimanile ti',» ta xhi. Waxanhka chal haka' tu', yaja' yetb'inhetik'a isb'a yeb' konimanil ti'. ¹⁶Maka ta chal kotxikin haka' ti': «Wal haninti'an manb'aq'satehojan, yuxin mach chiwokan yinh hune' nimanile ti',» ta xhi. Waxanhka chal haka' tu', yaj kaw yetb'inhetik'a isb'a yeb' hune' konimanil ti'. ¹⁷Ta b'aq' sate sunil konimanil ti', machim chu jab'eni, yeb' tato sunil konimanil ti' txikinnhe, machim chu koxuq'xen sam hunu tzet ye tu'.

¹⁸Wal xin ha' Komam Dios watx'enhe hunun yetb'i konimanil ti', yaniko Komam b'ay yal isk'ul. ¹⁹Q'inaloj tato lahanxanhetik'a hunun yetb'i konimanil matxam chu jalni b'ayet konimanil, chal tu'. ²⁰Yinh kaw isyelal, waxanhka tx'i'al yiq'ni isb'a, yaja' hune'nhe nimanilehal yehi.

²¹Isb'aq' kosat mach chu yalni tet koq'ab' haka' ti': «Matzet chaxhokniko wuhan,» mach xhihoj. Hakpax tu' kowi', mach chu yalni tet joj: «Matzet chaxhokniko wuhan,» mach xhihoj.

²²Ay hunteq'an yetb'i konimanil ti' kochnhe kaw machi ismunil chijab'e, yaja' ha' kaw ek'na ch'okniko ju. ²³Aypaxo yetb'i konimanil ti', kochnhe matzet chal yelapnoj, yaja' ha' ek'b'al chikoya'ilnhe. Haxa hunteq'an yetb'i konimanil mach k'ulch'ano jalni, ha' chijeb'atoj, hak tu' xin chu koyeniloj tato kaw ay yelapno yehi. ²⁴Wal hunteq'an yetb'i konimanil k'ulch'an yil-laxi mach yilalo chijako yenhel. Hak tu' yu iswatx'enkano Komam Dios konimanil ti', yunhe ha' hunteq'an yetb'i konimanil machi yelapno tu', ha' kaw ay yelapnoj. ²⁵Yuxinto mach chu iskajlenkanh isb'a ej yetb'i konimanil, hayet to lahanne chisya'ilnhen isb'a hunun. ²⁶Ta ay hunu yetb'i konimanil ti' chilahwi, sunil konimanil chi'ab'en isya'il. Taka ay hunu yetb'i konimanil chitzantelaxi, sunil konimanil chitzalahi.

²⁷Yuxin haka' isnimanil Komam Jesucristo je kosunil, hununonh ti' xin yetb'ixa isnimanil Komam tu' jehi. ²⁸Yuxin koxol hanhonh ayonhxako yul isq'ab' Komam, ay komunil chaq' Komam: b'ab'el ay mak ischejab' Komam Dios yehi, iskab' ay mak chalni tzoti' chitit tet Komam Dios, yinh yox ay mak kuywawom, aypaxo mak chaq' Komam Dios ishelanil isyeni ej k'ayb'alk'uile, aypaxo mak chi'aq'lax ishelanil yaq'ni kawxo makta ya'ay, aypaxo mak chi'aq'lax ishelanil iskolwahi, aypaxo mak chi'ijb'ali, yeb' xin ay mak chu yalni nan ab'xub'al. ²⁹Yuxin mach sunilo mak ischejab' Komam, mach sunilopaxo mak chihalni tzoti' chitit tet Komam Dios, mach sunilopaxo mak chikuywahi, yeb' mach sunilo mak chu isyeni ej k'ayb'alk'uile. ³⁰Mach sunilopaxo mak chi'aq'lax ishelanil yaq'ni kawxo anma ya'ay, mach sunilo mak chihalni nan ab'xub'al, yeb' xin mach sunilo mak chitxumnilo yinh tzet chal yelapno nan ab'xub'al tu'. ³¹Yuxin hex ti', aweko yinh hek'ul hesayni hunteq'an munil ek'b'alkano isk'ulal chaq' Komam texol.

Yaja' ayto hune'xa tzet kaw ek'b'al k'ul kowatx'eni, ha' b'ay chintzotelan yib'anhilo teyet.

Koxahannhen kob'a hununonh

13 ¹Q'inalo ta kaw helanonh jalni yab'xub'al anma yul sat yib'anh-q'inal ti', maka yab'xub'al eb'naj ángel, yaja' ta mach xahano chijil jet anmahil, lahanonhnhe haka' hunu ch'en campana tonhe chiq'anh, yeb' ch'en ch'en paq'an yehi tonhe chitz'inhxi. ²Waxanhka chijal tzoti' chitit tet Komam Dios, waxanhka xin chikotxum hunteq'an tzet ye tu' ewan ye yu Komam, waxanhka johta sunil tzet ay yul sat yib'anh-q'inal ti', yeb' waxanhka chu kohek'nilo hunu witz yul yehob'al yu ayko janma yinh Komam, yaja' ta mach xahano chijil jet anmahil, yinh haka' tu' machi yelapno jehi. ³Waxanhka xin chijitxq'ato tzet ayonh yinh anma meb'a', waxanhka xin chijako kob'a yinh kamikal, kat yaq'lax tz'ajoto konimanil xol q'a q'a', yaja' ta mach xahano chijil jet anmahil, nab'nhe hune' tu'.

⁴Wal xin ta yeli xahan chijil jet anmahil, ay konimank'ulal yinh, chikoyelo isk'ulch'anil kok'ul tet, yeb' mach chichiwa kok'ul yinh, yeb' mach chikololo'nhe kob'a, yeb' mach chijikanh kob'a. ⁵Machi xin chijilo istx'ixob'al hunu jet anmahil, machnhetaj jet chijako yinh kok'ul, mach chitit kohowal, wal xin chikonahulnheto istx'ojal chiswatx'e jinh. ⁶Mach chonhtzala yinh istx'ojal chiswatx'e hunu jet anmahil, wal xin to ha' yinh isk'ulal chiswatx'e yinh chonhtzalahi. ⁷Yet xahan chijil jet anmahil tu' chijaq' janma istecha sunil tzet chiswatx'e jinh, chikawxi kok'ul yinh tzet chala, ay konimank'ulal jechmani, niman chijute kok'ul yinh.

⁸Ha' hune' koxahannhen kob'a tu' mach b'aq'inhal chitanhi, wal jalni tzoti' chitit tet Komam Dios chi'apni istiemphal b'ay matxa chihal-laxi.

Chi'apnipaxo istiepmohal b'ay matxa chihal-laxpaxo nan ab'xub'al, yeb' matxa yilalo ay kohelanil. ⁹Yuto kohelanil yeb' jalni tzoti' chitit tet Komam Dios mach tz'ajanoj, ¹⁰yuxin hunteq'an tu' chilahwi ismunil yet chihul hunteq'an tz'ajan yehi.

¹¹Yet nich'an intohan haka' istzotel nixhte unin, hak tu' intzotelan. Haka' istxumnipaxo nixhte unin, hak tu' intxumnipaxojan, haka'paxo isnab'al nixhte unin, hak tu' innab'alan. Wal tinanh xin icham anma inxahan, xawakanojan tzet ye tu' yet nixhte unin. ¹²Tinanh maxhto chonhq'oji kotxumnilo tzet ye tu' haka' kaw yehi. Wal xin haka'tanhe jilni kosat yul hunu ch'en espejo q'ejmutz'munhe, hak tu' je tinanh. Yaja' chi'apni istz'ayikal b'ay chijil yinh kaw hab'an, haka' konhyohtanhen Komam Dios.

¹³Ay oxeb' tzet ye tu' ti' mach chitanhiloj, ha' ton janayto yul janma yinh Komam Dios, yeb' iskawxi kok'ul yinh Komam, yeb'paxo koxahan-nhen jet anmahil. Yaja' hune' kaw ek'b'al yelapnoj xol oxeb' ti', ha' ton koxahannhen jet anmahil.

Hunteq'an nan ab'xub'al

14 ¹Machojab' cheb'ej hexahannhen heyet anmahil, kat xin heyaq'ni heyanma hesayni hunteq'an munil chaq' Komam Espiritu Santo teyet. Yaja' ha' hune' kaw k'ul, ha' heyalni tzoti' chitit tet Komam Dios. ²Ha' mak chitzotel yinh nan ab'xub'al, ha' tet Komam Dios chitzoteli, maxhtaj tet anma, yu machi mak chitxumni yinh tzet chala. Yu Komam Espiritu Santo yuxin chal tzoti' machi mak ohtanhe. ³Wal mak chalni tzoti' chitit tet Komam Dios xin, chich'ib' eb'naj juxhtaj yeb' eb'ix janab' yinh yet Komam yu, kat yiptzelax yu, kat yaq'nipaxo yaq'lob'al yanma. ⁴Ha' mak chitzotel yinh nan ab'xub'al, hanhk'anhe hune' mak tu' chich'ib' yinh yet Komam, yaja' wal mak chihalni tzoti' chitit tet Komam Dios, chaq' ch'ib'o mak ayxako yul isq'ab' Komam.

⁵Wocheb'alan tato hesunil cheyal nan ab'xub'al, yaja' ha' hune' ek'b'al chiwochewan to cheyalik'o tzoti' chitit tet Komam Dios. Yuto ek'b'al k'ul jalni tzoti' chitit tet Komam Dios sata jalni hunuxa nan ab'xub'al, kachan-nhe ta ay mak chalnilo tzet chal yelapno hune' nan ab'xub'ale tu', ta hak tu' xin chich'ib' makta ayxako yul isq'ab' Komam Dios yu. ⁶Yuxin hex wuxhtaj hex wanab', q'inalo tato chinapnihan kexwila'an kat intzotelan yinh nan ab'xub'al teyet, machmi tzet cheyiq' yinh. Yaja' ta hunu tzet chaq' Komam Dios johtanhe, ha' chiwalan, maka helanile, maka ta chiwalan tzoti' chitit tet Komam Dios, maka hunuxa kuyb'anile; wal tu' chitxumchalo heyu.

⁷Q'inalo hunu te' su' maka hunu te' arpa, machim chikotxum tzet b'ital chi'alaxiko yinh te' ta mach watx'eb'ilo yul isnuq' te'. ⁸Yeb' xin ta ay hunu howal kat yoq'tzelax ch'en trompeta yu iskutxiko eb'naj

soldado, yaja' ta mach hab'ano yoq' ch'en, machim chiskutxb'ako isb'a eb'naj isto yinh howal. ⁹Kaw xin hakonhmi tu', ta mach hab'ano tzet chijala yet chonhtzoteli, çtzettaxka chu istxumlxaxilo tzet chijal tu'? Kaw nab'nhem chonhtzotel yinh haka' tu'. ¹⁰Yul sat yib'anhq'inal ti', kaw tx'i'al ab'xub'al, yaja' hunun ab'xub'al tu' ay tzet chaliloj. ¹¹Yaja' ta mach wohtajojan yab'xub'al hunu mak chitzotel wetan, nan konhob'al hinan yul sat hune' mak chitzotel tu', nanpaxo konhob'al naj yul insatan. ¹²Kaw wohtajan tato hex ti' kaw cheyoche hunteq'an munil chaq' Komam Espiritu Santo teyet, yaja' ha' hunteq'an ch'aq'ni ch'ib'o mak ayxako yul isq'ab' Komam Dios, ha' b'ay wal helahnikoj.

¹³Yuxin tato ay mak chitzotel yinh nan ab'xub'al, kaw yilal isq'anni ishelanil tet Komam Dios yunhe chu yalnilo yinh tzet chal yelapnoj. ¹⁴Ta chintxahlihan yinh nan ab'xub'al, yinh kaw yeli hanhe wanmahan chitxahli, wal innab'alan xin, mach chitxumcha yu yinh tzet chiwal tu'an. ¹⁵Yuxin çtzet wal jutén kob'a? Wal xin machnhehojab'taj janma chitxahli, kaw yilal kotxahlipaxo yeb' konab'al. Yeb'paxo yet chonhb'itni, machnhehojab'taj janma chib'itni, wal xin kaw yilal kob'itni yeb' konab'al. ¹⁶Ta ay hunujex cheyaq' tzalaho hek'ul yinh Komam Dios yinh hunu nan ab'xub'al, hanhe heyánma chitzalahi, wal mak chi'ab'en tzet cheyal tu' xin, mach chu yalni: *Hakojab' tu'* yuto mach chitxumcha yu tzet cheyala. ¹⁷Yinh kaw yeli lanhan heyaq'ni tzalaho heyánma yinh Komam Dios, yaja' mak chi'ab'en tu', mach chiq' yip yanma heyu.

¹⁸Haninti'an chiwaq'an yuch'andiosal tet Komam Dios yuto ek'b'alto chiwalan nan ab'xub'al tesataj. ¹⁹Yaja' yet chikokutxb'an kob'a yinh culto, woheb'alan waxanhka howeb'nhe tzoti' chiwalan, yaja' tanhe chiq' anma kuyb'anile yinh, sata walnihan 10 (lahonheb') mil tzoti' yinh ab'xub'al mach chitxumcha heyu.

²⁰Hex wuxhtaj hex wanab', machojab' haka' istxumni nixhte unin, machojab' hako tu' hetxumni. Wal xin haka'ojab' istxumni icham anma hakojab' tu' hetxumni, yaja' wal yinh istx'ojal, haka'ojab' istxumni nixhte unin maxhto isbab'al, hakojab' tu' cheyute heb'a. ²¹Tz'ib'nheb'ilkano yul Yum Komam Dios b'ay chala:

«Chintzotelan tet hune' konhob' tu' yinh nan ab'xub'al,
yeb' anma nan konhob'al chihalni intzoti'an,
yaja' maxhtik'a chab'eto anma tzet chiwalan,»ⁿ xhi Komam,
xhihayoj.

²²Yuxin hunteq'an nan ab'xub'ale tu' yechel ye tet anma maxhto chako isb'a yul isq'ab' Komam Dios, maxhtaj tet anma ayxako yul isq'ab' Komam. Wal tzoti' chihal-lax chitit tet Komam Dios xin, yechel ye tet anma ayxako yul isq'ab' Komam.

ⁿ 14:21 Is. 28:11-12

²³Q'inalo chekutxb'a heb'a kat heyichiko hesunil tzotelo yinh nan ab'xub'al, kat yokapno hunu mak maxhto ayoko yul isq'ab' Komam, maka hunu mak mach ohtanhe hune' tu', chimistxum hune' mak tu' ta matxa tz'ajano ye yul hewi'. ²⁴Wal ta hesunil lanhan heyalni tzoti' chitit tet Komam Dios xin, yet chi'okapno hunu mak maxhto ayoko yul isq'ab' Komam, maka hunu mak mach yohtajo tzet cheyu tu', wal tu' chimistxum isb'a hune' mak mulum tu', kat isnahni isb'a yu hunteq'an tzet cheyal tu'. ²⁵Hak tu' xin chu yelkano yenhel tzet k'uwan yul yanma hune' mak tu', kat yay jahnoj, kat yinayo isb'a tet Komam Dios, hak tu' xin chu yohtanhen hune' mak tu' ta kaw yeli ayko Komam Dios heyetb'ihoj.

Istxolal yinh yet ay culto

²⁶Yuxin hex wuxhtaj hex wanab', hayet chekutxb'an heb'a yinh culto ay hex chisje heb'itni, ayexpaxo xin chisje hekuywa yinh Istzoti' Komam Dios, maka heyalni tzet chaq' Komam Dios heyohtanheloj. Ayexpaxo xin chu hetzotel yinh nan ab'xub'al, ay hex xin chu heyalni yinh tzet chal yelapno hunteq'an ab'xub'al tu'. Aweko hunteq'an tu' yinh ismunil, yaja' yunhe yiq'ni yip heyanna yinh Komam. ²⁷Yet chextzotel yul nan ab'xub'al, kawanh, maka oxwanhnhe mak chitzoteli, yaja' yinh hununtajil, ayojab' mak xin chalnilo yinh tzet chal yelapno hunteq'an ab'xub'al cheyal tu'. ²⁸Taka machi mak chitxumnilo yinh tzet chal yelapno xin, k'ulmi ta mach cheyala, wal xin ischukilobjab' heyanna chitzotel tet Komam Dios.

²⁹Hakpax tu' xin yet chihal-lax tzoti' chitit tet Komam Dios, kawanh maka oxwanhnhe mak chitzoteli, wal eb'naj juxhta xin tonhehojab' ch'ok tukno yab'en yinh tzet kaw yehi. ³⁰Yaja' ta ay hunu tzet chaq' Komam Dios yohtanhelo hunu mak tz'onhanayo texol tu', hune' mak lanhan istzotel tu' xin yilal istukb'an istzoteli, kat istzotel hune'xa mak tu'. ³¹Hesunil chu heyalni tzoti' chitit tet Komam Dios, yaja' yinh hununtajil yunhe ay kuyb'anil cheyiq' yinh, kat yaniko yip heyanna. ³²Ha' mak chalni tzoti' chitit tet Komam Dios, chisje iskachni isb'a yet ay mak lanhan istzoteli, ³³yuto mach choche Komam Dios tato toxanche chonhwejchahi yet chikokutxb'an kob'a, wal xin hununtajil kotzotel yinh aq'ank'ulal.

Haka'tik'a ye ischejb'anil anma ayxako yul isq'ab' Komam Dios ay yul hunun konhob', ³⁴eb'ix janab', mach chu yok eb'ix tzotelo texol yet chekutxb'an heb'a yinh culto, yuto mach aq'b'il ischejb'anil eb'ix istzoteli. Wal xin kaw yijemojab' chute isb'a eb'ix haka' yalni isley ya' Moisés. ³⁵Tato ay hunu tzet ye tu' choche eb'ix yohtanheloj, isq'amb'e-hab' eb'ix tet yichamil b'ey yatut, yuto mach k'uloj tato chitzotel eb'ix yet kutxanexikoj.

³⁶Tajka chetxumu tato teyet b'ab'el aq'lax Istzoti' Komam Dios, yeb' tato hexnhe chab'ilxa heyu. ³⁷Tato ay hunu mak ischejab' Komam Dios ye chab'e, maka ta iptzeb'il yu Komam Espiritu Santo, yilal istxumni tato hunteq'an kuyb'anile chintz'ib'nhetoti'an, ischejb'anil Komam Dios yehi. ³⁸Yaja' tato machi yelapno hunteq'an kuyb'anile ti' yul sat, machojab'-paxo xin yelapno hune' mak tu' yul hesat.

³⁹Yuxin tinanh hex wuxhtaj hex wanab', ochewe heyala' tzoti' chitit tet Komam Dios, yaja' mach chekach yal-laxpaxo nan ab'xub'al. ⁴⁰Yaja' kaw haka'ojab' yehi, hak tu' chewatx'e yeb' xin yinh istxolal.

Istzoti'al yet yitzitzb'ikanh Komam Jesucristo

15 ¹Tinanh xin, hex wuxhtaj hex wanab', chiwochehan chenati Tzoti' yet kolb'anile halb'ilkano teyet wuhan, hune' chab'ilxa heyu b'ay linhan hex tinanh. ²Yuto yu hune' Tzoti' yet kolb'anile tu', yuxin kolb'ilexxa, yaj tato mach linhanoj hex yinh, chal yelapnoj tato mach heyayto yul heyanna yinh kaw isyelal.

³Ha' hunteq'an kuyb'anile chab'ilkano wuhan, ha' b'ab'el walan teyet. Kexinkuynihan tato kam Komam Jesús yu komul, haka' yalni yul Yum Komam Dios. ⁴Lahwi tu' ismujlax Komam, yaja' yinh yox tz'ayik yitzitzb'ikanh xol kamom, haka'tik'a yalni yul Yum Komam Dios. ⁵Isyeni isb'a Komam tet ya' Pedro, isyenipaxo isb'a tet eb'ya' ischejab'. ⁶Lahwi tu' xin, isyenipaxo isb'a Komam tet ek'b'al howeb' ciento eb'naj juxhtaj. Tx'i'al xin eb'naj aytok'o tinanh, ay xin eb'naj xakami. ⁷Isyenipaxo isb'a Komam tet ya' Jacobo, lahwi tu' xin isyenipaxo isb'a Komam tet eb'ya' ischejab'.

⁸Haxa yinh istzujanilxa xin isyeni isb'a Komam wetan, yaja' haka' hunu nich'an unin pitzk'ana yalanhto maxhto istiemphalo ispitzk'ahi, hak tu' wehan. ⁹Yuxin kaw matzet welapnojan xol eb'ya' ischejab' Komam chiwab'ehan, yuxin mach intzanojan yal-lax ischejab' Komam Jesucristo winhan, yuto waq' ek'ojan ya' yanma makta ayxako yul isq'ab' Komam Dios yet yalanhtokanoj. ¹⁰Yu isk'ulch'anil isk'ul Komam Dios, yuxin ayinikojan yinh hune' munil ti', yaja' mach nab'nheho hune' isk'ulch'anil isk'ul Komam yaq' wettu'an yuto ek'b'alto chinmunlahan sata eb'ya' ischejab' Komam. Yaja' maxhtaj yu wipan, wal xin to ha' isk'ulch'anil Komam chikolwa winhan. ¹¹Yaja' machi yok yinh mak chihaln'ik'o kuyb'anile tu', waxanhka haninan, maka eb'ya' ischejab' Komam, ha' hune' kaw yilal ha' jalnik'ojanh kuyb'anile tu', hune' chab'ilxa yul heyanna.

Chi'ititzitzb'ikanh anma kamnaxa

¹²Ha' kuyb'anile jalanh teyet chala tato ititzitzb'ikanh Komam Jesucristo, yaja' tztet yinh xin ay hex cheyala tato mach chi'ititzitzb'ikanh

kamom? ¹³Ta mach chi'ititzb'ikanh anma kamnaxa, machim itzitzb'ikanh Komam Jesucristo. ¹⁴Ta mach itzitzb'ikanh Komam Jesucristo machim tzet chal yelapno kuyb'anile jaq'anh teyey, nab'anhem chijako janma yinh Komam. ¹⁵Ta hak tu' leq'ti'onhmi yinh Komam Dios, yuto chijala tato ha' Komam Dios aq'ni itzitzb'okanh Komam Jesucristo. Machim yaq' itzitzb'okanh Komam Dios Komam Jesucristo tato yeli mach chi'ititzb'ikanh kamom. ¹⁶Tato yeli mach chi'ititzb'ikanh anma kamnaxa, machmi itzitzb'ikanh Komam Jesucristo. ¹⁷Ta mach itzitzb'ikanh Komam tu' xol kamom, nab'nhem chijako janma yinh Komam Dios, ayonhtomiko yinh komul. ¹⁸Hakmipax tu' eb'naj chab'ilxa Komam Jesucristo yu yet iskami, k'aynamikanto eb'naj yinh hunelnhe. ¹⁹Ta iskawxob'al kok'ul yinh Komam Jesucristo yulnhe sat yib'anhq'inal ti' yehi, maxhtik'am nich'ano isk'ulal jet yinh haka' tu'.

²⁰Wal xin, yinh kaw yeli itzitzb'ikanh Komam Jesucristo xol kamom, haka' b'ab'el sat tz'unub' chaq'a, hak tu' yu isb'ab'i yitzitzb'ikanh, ha' chi-yeni ta chi'ititzb'ipaxkanh kamom.

²¹Yu hune' naj, yuxin hul kamikal yib'anh anma yul sat yib'anhq'inal ti', yaja' yu hune'xa naj xin, yuxin chi'ititzb'ikanh anma yinh kamikal. ²²Haka'tik'a chu iskamto anma yu ismul naj Adán, haktik'apax tu' chu yulkanh isk'ul anma yu Komam Jesucristo. ²³Yuxin yinh istxolal aykoj, ha' Komam Jesucristo ha' b'ab'el itzitzb'ikanh, haxa yet chul Komam yet iskayel kat yitzitzb'ikanh makta yetxa Komam.

²⁴Lahwi tu' xin, kat yul islahob'al tz'ayik b'ay chiq'oji Komam yinh eb'naj kanhyehi yeb' eb'naj ayko yahawilo konhob', yeb' ischejab' naj matzwalil chi'ek' xol jaq'eq' yeb' yul yib'anhq'inal ti', katto yaniko Komam sunil tzet ay yul isq'ab' tet Komam Dios Mame. ²⁵Yaja' yet maxhto chako Komam Jesucristo sunil ti' yul isq'ab' Komam Dios ch'ok Komam Yahawiloj masanto yet chi'ok sunil mak ayko ishowal yinh Komam yalanh yoj. ²⁶Haxa hune' islahob'al b'ay chiq'oji Komam xin, ha' ton yinh naj kamikal ayko ishowal yinh Komam. ²⁷Tz'ib'nheb'ilkanoj tato sunil tzet ye tu' chakto Komam Dios yalanh yoj Komam Jesucristo, yaja' wal Komam Dios mach chi'okto yalanh yoj Komam Jesucristo, yuto ha' Komam Dios chi'aniko sunil yalanh yoj Komam Cristo. ²⁸Yet chi'okkanto sunil yalanh yip Komam Jesucristo tu' xin, ha' kaw Komam tu' chakto isb'a yalanh ischejb'anil Ismam anheko sunil tzet ye tu' yul isq'ab', hak tu' xin haxanhe Komam Dios Yahaw chukaniko yinh sunil tzet ye tu'.

²⁹Yeb'paxo hunxa, haka' anma chi'ah ha' iswi' selelo anma kamnaxa, yaja' ta mach chulkanh isk'ul kamom, ¿tzet yinh xin chi'ah ha' iswi' anma selelo anma kamnaxa tu'?

³⁰Ta machi itzitzb'ikanh kamom, ¿tzet yinh xin chijaq' janmahanh hanhonh ischejab' Komam Dios honhti'anh jjielenanh isya'tajil chul jib'anhanh hunun tz'ayik? ³¹Hex wuxhtaj hex wanab', haninti'an kaw

hunun tz'ayik inhinni hinb'ahan inkaman. Hune' ti' kaw yeli haka' hune' tzalahilal chiwab'ehan teyinh, yuto ayexxako yul isq'ab' Komam Jesucristo. ³²Haninti'an kaw ek'ya' wanmahan b'ey Efeso haka'tanhe waq'lehan howal yeb' ej no' howla noq'. ¿Tzet xin chiwiq'an yinh hune' tu' tato mach chi'ititzb'ikanh kamom? Ta hak tu', ha'mi ye yu anma chihalni haka' ti': «jWa'ojonhwe yinh kaw k'ul, jaq'a'we tzet choche janma, yuto kamomonhxataxka yet hekal!» xhi.

³³Hex wuxhtaj hex wanab', mach cheyaq' sub'chaho heb'a, kajxam yal-laxi: «Ta chijetb'inhe kob'a yeb' anma tx'oj isb'eyb'al, nixhtejalnhe kokuynito kowatx'en istx'ojal tu',» xhi. ³⁴Nachahojab'ilo heyu yinh istx'ojal b'ay ayexikoj yeb' matxa cheyako hemul, yuto ay hex maxhto heyohtajo Komam Dios. Chiwalan hune' ti' yunhe hetx'ixwikanh.

Yinh tzet chu yititzb'ikanh anma kamnaxa

³⁵Aymi mak chiq'amb'en haka' ti': «¿Tzettaxka chu yititzb'ikanh anma kamnaxa? yeb' ¿tzettaxka jilni isnimanil yet chi'ititzb'ikanh?» xhimi.

³⁶Ha' mak chalni haka' tu' kaw suk. Q'inalo ta chikotz'un hunu ixim hinhat, kaw yilal isq'ato hune' hinhat tu', haka'tanhe chikami, haxa yanma ixim xin chi'ahiloj. ³⁷Maxhtaj awalxa yehi chikotz'unni, wal xin to ha' hinhat tu' chikotz'unu, haka' ixim hinhat trigo maka hunuxa nan hinhatil. ³⁸Haxa Komam Dios xin chi'aq'ni aholo ixim hinhat tu' haka' choche isk'ul, hatatik'a tzet hinhatil chikotz'unu ha' xin chi'ahiloj.

³⁹Yuxin mach sunilo nimanile lahan, wal xin nantik'a isnimanil anma, nanpaxo isnimanil no noq' kanheb' yoj, nanpaxo isnimanil no' ch'ik, nanpaxo isnimanil no' kay.

⁴⁰Hakpax tu' xin, ay nimanile yet satkanh yehi, aypaxo nimanilehal yet sat tx'otx'al ti'. Yaja' xin nananta jilni isk'ulch'anil isnimanil tzettaj ye tu' ay satkanh, yeb' xin nan jilni isk'ulch'anil isnimanil tzettaj ye tu' ay sat tx'o tx'otx' ti'. ⁴¹Hakpax tu' tz'ayik, mach lahana isq'aq'al yeb' ixahaw, mach lahanpaxo yeb' tx'umel, hakpax tu' ej tx'umel mach lahana isq'aq'al hunun.

⁴²Hak tu' chu yititzb'ikanh anma kamom. Hune' nimanile chimujlaxi chi'etaxtoj, yaja' nanxa nimanile chu ispitzk'akanh, matxa xin chi'etaxtoj.

⁴³Chimujlax hune' nimanile ayko istx'ojal yinh, wal yet chi'ititzb'ikanh xin, k'ulch'anxa jilni. Chimujlax hune' nimanile machi yip, haxa yet chi'ititzb'ikanh kaw ayxa yip. ⁴⁴Chimujlax hune' nimanile yet yul sat yib'anhq'inal ti', haxa yet chi'ititzb'ikanh xin, yetxa espíritu yehi. Ay nimanile yet yul sat yib'anhq'inal ti', aypaxo nimanile yet espíritu.

⁴⁵Chal yul Yum Komam Dios haka' ti': «Ha' naj Adán, naj b'ab'el winaj, anma yu iswatx'elax naj, aq'b'il isq'inal naj,» xhihayoj. Haxa naj iskab' Adán, yet satkanh ye naj, ha' naj chi'aq'ni q'inale mach istanhb'al. ⁴⁶Wal xin b'ab'el hul tzet ye tu' yet yul sat yib'anhq'inal ti', tzujan tu' xin, yul

tzet ye tu' yet espíritu. ⁴⁷Naj b'ab'el winaj, yinh tx'o tx'otx' watx'elax naj, yuxin yet tx'o tx'otx' ye naj. Wal naj iskab' yet satkanh ye naj. ⁴⁸Ha' nimanile yet yul sat yib'anhq'inal ti', lahan haka' isnimanil naj watx'eb'il yinh tx'o tx'otx', wal nimanile yet satkanh xin, lahan haka' isnimanil naj tit yul satkanh.

⁴⁹Yulb'al yet ayonh yul sat yib'anhq'inal ti', lahan konimanil yeb' naj b'ab'el winaj watx'eb'il yinh tx'o tx'otx', wal yet b'aq'inh xin, lahan chi'eliko konimanil haka' naj yet satkanhil ye hi.

⁵⁰Hex wuxhtaj hex wanab', chiwalan teyey tato hune' konimanil ti', mach chu yapni isk'atanh Komam Dios, yuto chib'e yeb' b'aj; hunteq'an chi'etaxto ti', mach chu yapni b'ay mach chi'etaxto tzet ye tu'. ⁵¹Chiwochehan cheyohtanhelo hune' tzet ye tu' ewanyehi: Mach kosunilo chonhkami, yaja' xin kosunil chihel-lax konimanil, ⁵²yuto yinh kaw lemb'il, haka'nhe ismutz'la kosat, yet chi'oq' ch'en islahob'al trompeta, yet chi'oq' ch'en tu' kat yitzitzb'ikanh makta ayxako yul isq'ab' Komam xakami, matxa xin b'aq'inhil chikami. Walonh itzitzonh ti', chihel-lax konimanil. ⁵³Yuto hune' konimanil chi'etaxto ti', chihel-lax yinh hune' nimanile mach chi'etaxtoj. Hune' konimanil chikamto ti' chihel-laxi, ha' hune' satkanhil chi'aq'lax seleloj hune' matxa b'aq'inh chitanhiloj.

⁵⁴Hune' konimanil chi'etaxto ti', chiheli kat yok yinh hune' nimanile machi etaxtoj. Chihel-lax konimanil chikamto ti' yinh hune' nimanile mach chikami. Hak tu' chu yijni isb'a tzet tz'ib'nheb'ilkano yul Yum Komam Dios b'ay chala:

«Chik'aytzela xilo naj kamikal, ay hune' mak chiq'oji yinh naj yinh hunelnhe.

⁵⁵Yuxin hach kamikal ¿b'aytu'wal ay hahelanil?

¿B'aytu'wal ay hawip hapotx'wahi?»^o xhihayoj.

⁵⁶Ha' mule chonhyaq' kamoj, wal isley Komam Dios xin ip yaniko isya'tajil jib'anh. ⁵⁷Yaja' yuch'andios tet Komam Dios, yuto xakonhq'oji yinh naj kamikal, yaj yu Komam Jesucristo!

⁵⁸Yuxin hex wuxhtaj hex wanab', hex xahan ay wuhan, linhb'awe heb'a, machojab' chexpax teyintaj. Kaw munlahanhwe yinh ismunil Komam Dios sunilb'al tiempo, yuto johtaj tato mach nab'nheho chonmunla yinh ismunil Komam Jesucristo Jahawil.

Ch'en kolwal chi'alaxto tet eb'naj ayxako yul isq'ab' Komam Jesucristo

16 ¹Wal ch'en heyofrenda chikutxi texol, ch'en chi'alaxto tet mak ayxako yul isq'ab' Komam Dios, chekutxb'awe ch'en haka' yu walnihan tet makta ayxako yul isq'ab' Komam ay yul ismajul Galacia. ²Hunun domingo yinh semana, yilal hepohnilo hanik'o ch'en melyu

cheyiq' yinh hemunil hunun hex, hatatik'a hanta chikolwa Komam teyinh, kat hek'ub'antoj, haxinwal yet chinapnihan matxa yilalo ch'ah ch'en texol. ³Hato yet chinapnihan texol kat wanitojan mak sayb'il-xa heyu, kat yinito eb'naj hunu carta yeb' ch'en hekolwal tu' tet eb'naj juxhtaj ay b'ey Jerusalén. ⁴Yaja' ta hankawinan chintohan xin, yilaltik'a chitopaxo eb'naj wintajan.

**Yalto ya' Pablo tato chi'apni ya' yila' makta
ayxako yul isq'ab' Komam b'ey Corinto**

⁵Hayet chintohan yinh inb'el tu'an yilal wek'an b'ey Macedonia, lahwi tu' xin kat wapnihan kexwilnojan b'ey Corinto tu'. ⁶Etzanhem chinkanan hanik'o tiempohal tek'atanh, maka xin ha' b'ey tu' ayinik'ojan chi'ek' nhab'il; ta hak tu' hexxa chekolwa winhan yinh inb'elan yet chinelan texol. ⁷Mach chiwochehan tato yinh anhe chinek'an kexwila'an, wal xin chiwochehan chinkanan hanik'o tiempohal texol, ta hak tu' chi'el yinh isk'ul Komam Dios.

⁸Yaja' xin yilalto inkanan b'ey Efeso ti' masanto yet chi'ek' q'inh pentecostés. ⁹Yuto kaw chalte isb'a munil yinh ismunil Komam Dios chiwilan, yuxin chinkanan waxanhka xin kaw ay mak ayko ishowal winhan.

¹⁰Ta chi'apni naj Timoteo tek'atanh xahan cheyil naj, haxinwal chitzala isk'ul naj texol, yuto chimunlapaxo naj yinh ismunil Komam Dios haka' inti'an. ¹¹Tajka mach chikam hek'ul yinh naj, wal xin kolwahanhwe yinh naj haxinwal chislah naj isb'el yinh tzalahilal kat yul naj kok'atanhanh, yuto chijechmahanh naj yeb' eb'naj juxhtaj.

¹²Wal juxhta Apolos, walan tet ya' tato chito ya' yinta eb'naj to kexilnoj, yaja' machisjeto ya', yettojab' hunelxa chito ya' yet ay ishamanil ya'.

Yet istaq'lito ya' Pablo tet makta ayxako yul isq'ab' Komam b'ey Corinto

¹³Hex wuxhtaj, hex wanab', kaw majwahanhwej, linhb'awe heb'a yinh hune' b'ay ayxako heyanna, kaw mach chekkiwi, aq'we yip heyanna.

¹⁴Sunilobjab' tzet chewatx'e, ayobjab' isk'ulch'anil hek'ul yinh.

¹⁵Hex wuxhtaj hex wanab', kaw heyohtaj tato naj juxhta Estéfanas yeb' yuninal ha' b'ab'el yako isb'a yul isq'ab' Komam Dios b'ey yul ismajul Acaya tu'. Kaw xin hunelnhe yeko yanma naj iskolwa yinh mak ayxako yul isq'ab' Komam. ¹⁶Chiwochehan ta cheyije tet naj Estéfanas yeb' yuninal tu', yeb' tet sunil makta chikolwahi yeb' chimunla yinh ismunil Komam.

¹⁷Kaw chintzalahan yuto hul naj Estéfanas yeb' naj Fortunato yeb'paxo naj Acaico b'ey ti', yuto yet chiwilnihan yinh eb'naj haka'ojtam hex chiwilikojan teyinh. ¹⁸Yinh kaw yeli eb'naj ti' yaq' tzalaho eb'naj ink'ulan, haka' yu yaq'ni tzalaho eb'naj hek'ul. Eb'naj juxhta haka' eb'naj ti', ayobjab' yelapno eb'naj yul hesat.

¹⁹Eb'naj juxhta yeb' eb'ix janab' ayxako yul isq'ab' Komam Dios yul hunu konhob' yul ismajul Asia ti', chalto ta cheyil heb'a. Hakpax tu' naj juxhta Aquila yeb' ix janab' Priscila yeb' eb'naj juxhta chiskutxb'a isb'a yul yatut naj, chalpaxtoj ta cheyil heb'a. ²⁰Hakpax tu' eb'naj juxhta ay b'ey ti' chalpaxto eb'naj ta cheyil heb'a. Yeb' xin q'amb'ewepaxo teyet yinh tzalahilal hanik' heye hunun hex.

²¹Hanin Pablo inti'an hankawinan chintz'ib'nhehan yul carta ti' ta cheyil heb'a.

²²Ta ay hunu mak mach chi'ochoen Komam Jesucristo, tijab' isya'tajil yib'anh.

¡Mam Jesucristo Jahawil, hulanh!

²³Yaq'ab'ayo Komam Jesucristo isk'ulch'anil isk'ul teyib'anh.

²⁴Kaw xahan ay hex hesunil wuhan, hex ayexxako yul isq'ab' Komam Jesucristo. ¡Hakojab' tu'!